

# أمل

(قصة)

همسة تيسير

دار كليوباترا للنشر والتوزيع

فهرسة أثناء النشر إعداد إدارة الشئون الفنية  
تيسير , همسة

أمل : قصة / همسة تيسير

القاهرة : دار كليوباترا للنشر والتوزيع.

عدد الصفحات : 94

التراقيم الدولى : 4-36-6619-977-978

رقم الإيداع : 2017/23210

تصنيف الكتاب :

القصص العربية



الناشر دار كليوباترا للنشر والتوزيع

المدير التنفيذي : ضحى جبر

رئيس مجلس إدارة : عفاف محمد علي

تصميم الغلاف : محمد راضي

عمليات الإخراج الداخلى والتصحيح اللغوي

(دار كليوباترا للنشر والتوزيع) تصحيح: سمر حجازي

المراسلات :

لاتصال: / 01125574129/ 0225244534/01019983371

dar.cleopatra@gmail.com

الطبعة الأولى

جميع الحقوق محفوظة للمؤلف والناشر، ويحظر نشر أو اقتباس

هذا العمل , ومن يخالف ذلك يتعرض للمساءلة القانونية.

## إهداء

هذه القصة القصيرة جزء من قصتي ونتاج إيمان الكثيرين بي وتشجيعهم ممن أعتبرهم شاركوني في كتابتها، وعلى رأسهم عائلتي وبالأخص والدتي (تيسير) وخالتي (سمر) محررة القصة، وأختاي (روان) و(مها)، وأصدقائي الذين أخاف أن أنسى ذكر أحدهم. وأود أن أعبر عن شكري وامتناني لكل شخص آذاني وساعدني على تحقيق حلمي. وأخص بالشكر الكاتب (مجد عباس) أستاذي ومعلمي، والكاتب (طارق رفعت) أستاذي وأخي الذي لطالما شجعني ولم يبخل عليّ بنصائحه الثمينة.

## مقدمة

بطلتنا هي (الأمل) الذي نعيش به حتى لا نموت وسط عالم مادي نقابل فيه العديد من (الأسماء)، ونصطدم فيه بأنواع عديدة من الحب الذي لا ندركه، وإن أدركناه لا نستمتع به خوفاً من الألم، ولكن أحياناً يسعى الحب إلينا ويرسل لنا (بسام).

(1)

أخرجت (أمل) هاتفها المحمول بغضب من حقيبتها السوداء وهي جالسة في المطعم المفضل لأخيها (محمود) الذي انتظرته طويلاً ولم يأت، وظن كثير من رواد المطعم أنها تنتظر حبيبها الذي لم يحضر. كانت أمل في أوائل الثلاثينيات، شعرها أسود ناعم طويل، وعيونها عسلية، وجسدها ممشوق. ولطالما أحاطت (أمل) هالة من الحزن زادت غموضاً وجاذبيةً. اتصلت (أمل) بأخيها عدة مرات حتى رد عليها أخيراً:

- أيوه يا (أمل)!
- (محمود) إنت فين؟ أنا بقالي ساعة قاعدة مستنيك وكل شوية يجيلي الجارسون واقعد أقوله معلش ولسه... مش ممكن طريقتك دي!
- مهو أنا مش جاي!
- إنت مش إيه؟
- أنا مش جاي.
- وده ليه بقى إن شاء الله؟
- أصل صاحبي اتصل بيا وهيلعبوا كورة النهارده وبعدين هيسهروا على القهوة ولما عزموني وافقت.
- (محمود) هو كل مرة نفس الحركة!! يا أخي أنا عاملة كل ده عشان أحتفل بأول سنة ليك في الكلية. معرفش إيه اللي جراك من ساعة ما دخلت الجامعة... خلاص أقفل يا (محمود)!!!
- أقفل إيه؟ ما إنتِ اللي متصلة!

- مش وقت هزارك على فكرة، وكمان ليك نفس تهزرا!
- خلاص بقى أنا آسف وخليك جَدَعَة وابقى روقيلي الجو في البيت عشان ميعملوليش حوار وينكدوا عليا.
- الحمد لله إن كده كده (بابا) مبقاش دريان بينا، بس ده بقى جِه على دماغنا عشان (الست الوالدة) فُضِّيت لنا وده مش كويس!
- والله ما عارفة أقولك إيه اقفل أحسنلك!
- ماشي يا (أمل) هَهْفِل، بس افتكريلها أنا زعلان منك!
- مع السلامة يا (محمود).
- باي يا (أمولة).
- كرر النادل سؤاله: "تشربي حاجة يا فندم؟"
- معلش حصلي ظرف طارئ ولازم أمشي.

وقفت (أمل) وهي في عجلة من أمرها خجلة، وحاولت أن تسيطر على أعصابها ومشاعرها حتى تصل إلى المنزل أو سيارتها على الأقل. أخرجت مفتاح سيارتها (التويوتا كورولا الزرقاء موديل 2017) ثم ألقت حقيبتها على الكرسي بجوارها. التقطت هاتفها المحمول وفتحت ملف الصور وبدأت الدموع تنهمر من عينيها كلما تأملت صور طفولتها، خصوصاً صور (جدتها المتوفاة) التي لم تنسها أبداً حتى اليوم، ولم تنس وفاتها المفاجئة التي سببت لها صدمة كبيرة آنذاك وطبعت بداخلها أثراً عميقاً لا يفارقها.

وأخذت تتأمل بحزن صورها مع (والدتها) و(والدها) و(محمود)، وتذكرت ذكرياتهم معاً وحالهم الآن وهم يجتمعون صدفةً بسبب انشغال والدها (حسين رشدي)

بالبورصة وحركة السوق وتزايد المشاكل بينه وبين (والدتها)،  
وتغير (محمود) بعد دخوله الجامعة كحال الشباب الذين  
ينغمسون في حياتهم الجامعية الجديدة بما فيها من إغراءات  
وتجارب، وتذكرت كيف أن (محمود) شخص ملول ومُغامر  
بطبعه.

استكملت (أمل) حوارها مع نفسها وتساءلت كثيراً ما إذا  
كانت تطلب المستحيل، ولكنها أجابت نفسها أن كل ما في  
الأمر أنها ساذجة!

- بس أنا مقصدتش كده أنا تعبانة جداً ومحتاجلهم  
بس جنبي!

- إنتِ بتطلبي من اللي جنبك يكونوا جنبك؟!  
- أنا على طول جنبهم رغم إني دكتورة نسا وتوليد ووقتي

مش ملكي.

- برافو عليكِ استمري!

وفي تلك الأثناء رن هاتف (أمل) المحمول ولمعت عيناها من  
شدة السعادة بمجرد رؤيتها اسم (أسماء) صديقتها المقربة.  
ويبدو أنها انتظرت تلك المكالمة طويلاً:

- (أسماء)؟!!

- عاملة إيه يا (أمل)؟

- أنا تمام ... تمام أوي الحمد لله! إنتِ عاملة إيه  
المهم؟

- الحمد لله كويسة بس شغل البنك مطلع عيني  
كالعادة. مالك يا بنتي؟ شكلك مش مصدقة إني

بكلمك!

- بصراحة آه.



أنهت (أسماء) المكالمة وانطلقت (أمل) بالسيارة نحو المنزل  
بعد يوم عمل طويل وخيبة أمل كبيرة قائلة لنفسها: "أنا فعلاً  
ساذجة."

(2)

وصلت (أمل) إلى مدينة نصر - حيث تقيم بشارع مصطفى النحاس - وركنت سيارتها صفاً ثانياً كالعادة وأوصت بواب العمارة أن يبلغها إذا احتاج أحد الجيران أن تُحرك سيارتها. صعدت بالمصعد حتى الدور الثالث واتجهت نحو الشقة الموجودة يمين المصعد وأدخلت مفتاح الشقة في القفل. عندما سمعت (الأم) صوت (أمل) جرحت إصبعها بالسكين التي كانت تقطع بها الطعام في المطبخ وهي في حالة من عدم التركيز كعادتها مؤخراً. دخلت (أمل) على صوت أنين (والدتها):

- (ماما)؟ إنتِ كويسة؟ عورتِ نفسك تاني برضه؟ وحياتي عندك خلي بالك على نفسك وريهالي كده!
- يا حبيبي متقلقيش ده جرح بسيط، وبعدين يبجي إيه بس جنب الدنيا اللي بتجرح فينا طول الوقت. ابتسمت (أمل) وهي تعرف تماماً ما قصدته (والدتها):
- هاتِ صباعك يا (ماما) أظهرلك الجرح. أثناء تطهير الجرح، سألت الأم (أمل):
- فين الباشا (محمود)؟
- (محمود) نزل مع صحابه وهيتأخر شوية.
- مهو طالع لأبوه.
- ضحكتا بشدة وقبّلت (أمل) إصبع (والدتها) واتجهت إلى غرفتها لتنام.
- لحقت الأم بابنتها سائلة:

- (أمل)؟
- أيوه يا (ماما).
- هتنامي؟
- فهمت (أمل) أن (والدتها) بحاجة إليها ولا تريد البوح بذلك:
- كنت بَفكر أنام بس مش جيلي نوم.
- طب ما تيجي يا بنتي تقعدني معايا شوية بقالنا كتيبير متكلمناش مع بعض.
- خلاص هَغير بس هدومي وجاية... حضري لنا بقي كوباتين شاي بالنعناع من إيديك الحلوة يا جميل ونقعد في البلكونة.
- عِنيا... عقبال ما تغيري هدومك هتلاقيني قاعدة بره ومستنياك.
- غيرت (أمل) ملابسها وارتدت ملابس فضفاضة مريحة وذهبت إلى (والدتها) ليجلسا معاً
- وحشتيني أوي يا (ماما) و(بابا) وحشني و(محمود) كمان... عارفة؟ ريحة البيت نفسها وحشاني.
- حاسة بيكٍ مهو إحنا بقينا بنتقابل بالصدفة زي الغُرب... فين أيام زمان؟
- فاكرة يا (ماما) لما كنا كلنا بنتغدى سوا وننزل نروح السينما في الأجازات و.....
- فاكرة يا حبيبي... أنا اللي مصبرني خروجة كل أسبوع اللي بتخرجهالي. أنا آسفة على اللي بيحصل بيني وبين أبوكِ بس...
- حتى لو كنتِ غلطانة يا ماما فالعقاب مَيبقاش كده، ولا الحل إنه يقضي معظم الوقت في شغله أو مع صحابه، يبجي ياكل وينام أو ينام بس وناسيني أنا

- و(محمود) ... طب سيبك مني أنا كبيرة وأعرف آخذ  
بالي من نفسي إنما (محمود) محتاجله وبقي يقلده.
- مكنش نفسي تسمعي اللي سمعته إمبراح يا (أمل)!
  - بصراحة أنا مختلفة معاك يا (ماما)... أنا بحمد ربنا إني  
أخيراً شُفت وسمعت بنفسي الحقيقة اللي كان لازم  
أعرفها من زمان واللي كان لازم أعرفها بنفسي وبدون  
أي تجميل من بتوع زمان.
  - تقصدي إيه يا (أمل)؟
  - أقصد إنك إنسانة مثقفة جداً وإنّ اللي علمتيني  
أكون قوية وبمية راجل، وفي الآخر أشوفك ضعيفة  
كده وسلبية للدرجة دي؟
  - مهو يا (بنتي) مَبَقاش ينفع أطلب الطلاق لإن (جدك)  
راجل كبير يموت فيها، والناس هتاكل وشي... وبعدين  
أنا كبرت هو يعني أنا هتجوز تاني! كمان قدام الناس  
اسمنا ملمومين في بيت واحد، وبرضه عشان يشوفك  
إنّ وأخوكِ لإننا لو اطلقنا مش هتشوفوه تاني....  
ولما عريسك يتقدملك لازم نكون أسرة كاملة قدامه  
عشان نشرفك... ويمكن ربنا يهديه لإن أكيد حد  
بيلعب في دماغه، ده مش كلامه.
- نظرت أمل في عيني والدتها بضع دقائق ثم قالت:
- (ماما) إنّ مقتنعة بأي حاجة من اللي قولتها؟ هو  
الناس لازم تطلق عشان تتجوز بس؟ واللي بيصبروا  
عشان خاطر عيالهم، الحمد لله عيالك كبروا وواقفين  
جنبك في قرارك لو خدتيه! هو إنّ كده شايقة إنه  
أصلاً شايقنا؟ هو يعرف إيه عننا؟ ومعلش هو مش  
مغيّب ولا صغير عشان يمشي ورا كلام أي حد... أنا

- دكتورة، لو هو مريض هقولك وهنستحمله، بس اللي  
بيتمارض ده مش عليا!!
- عارفة بس لو تريحيني وأطمئن عليكِ وتتجوزي...  
اجوزي اللي إنتِ عاوزاه، عمري ما هغصبك على  
جوازة إنتِ مش عوزاها!
- (ماما) هو إحنا بنكلم في إيه؟  
- الموضوع ده هو الأهم، وبعدين مهو مش كله شغل  
يا (بنتي)، هتبقي وحيدة خصوصاً إنك مبقتيش  
صغيرة.
- ماله شغلي؟ أنا بحب شغلي ومكفيني جداً والمثل اللي  
بيقولك "ضل راجل ولا ضل حيطة" ده أي كلام،  
وأظن إحنا أقرب مثل على كده!

(3)

اتصلت (أمل) (بأسماء) أثناء قيادتها سيارتها إلى المستشفى كعادتها، ولكن (أسماء) كانت من النوع الذي يصعب الوصول إليه على الرغم من عدم انشغالها الشديد. لذلك كانت العلاقة بينهما علاقة من طرف واحد، وبدأت (أمل) تعتاد على الأمر أو هكذا كانت تحاول إقناع نفسها. وفجأة تذكرت (أمل) ضاحكة حديث أصدقائها وعلى رأسهم (أسماء) حينما قالوا لها لا أحد سيصدق أن هناك فتاة تعامل صديقاتها بهذا القدر من الرومانسية.

اتصلت (أمل) (بأخيها) لترى إن كان ذهب إلى الجامعة أم لا ولكنه لم يرد، فعلمت أنه لم يذهب اليوم أيضاً إلى الجامعة وأنه ما زال نائماً في غرفته وأن (والدتها) الآن تولول على الأغلب بأعلى صوتها: "يا رب الواد وأبوه عليا! يا ريتني جبتهم بنتين."

وصلت (أمل) المستشفى مبكراً لأن الطريق كان خالياً بعض الشيء، وعندما دخلت إلى العيادة بدأت التحيات تنهال عليها:

- دكتورة (أمل) صباح الفل!  
- دكتورة (أمل) صباح الخير... حالاً هحضرلك فنجان القهوة بتاع حضرتك.  
ردت عليهما (أمل) بكل تواضع واحترام:

- صباح الخير يا (أميرة) يا حبيبتي... تسلملي يا (حاج إسماعيل) كلك ذوق ربنا يباركلك.
- دخلت (أميرة) وراء (أمل) لتخبرها عن جدول اليوم:
- النهارده في مرضى كثير شكلنا هنطول زي إمبراح.
- قصدك زي كل يوم.
- عندك حق يا دكتورة.
- دخليلي أول مريضة بعد ما (حاج إسماعيل) يدخلي القهوة.
- حاضر يا دكتورة.
- أغلقت (أميرة) الباب وارتدت (أمل) البالطوه الأبيض، ثم دخلت أول مريضة بعدما أحضر لها (الحاج إسماعيل) القهوة. وكانت تلك المريضة من أقدم مريضاتها:
- إزيك يا (دكتورة) وحشاني والله.
- إزيك يا قمر إنت تنوريني في أي وقت بس من غير ما تكوني تعبانة... طمني عليك؟ والواد المجرم اللي اسمه (محمد) عامل إيه؟
- كويس الحمد لله، مهو مولود على إيديك.
- إيه في حاجة جديدة في السكة؟
- ده اللي جايبني فعلاً لإني عملت تحليل الحمل بتاع الصيدلية ومرة إداني إيجابي ومرة إداني سلبي فقلت أرجع لحضرتك أحسن.
- الدورة أخبارها إيه؟
- حضرتك عارفة هي أصلاً متلخبطة عندي، فأنا افتكرت لخبطة عادية لكن آخر مرة جاتلي متهيألي كانت قبل أربع أو خمس شهور.

- طيب يا حبيبي خلينا نعمل سونار دلوقتي ونشوف،  
جاهزة؟
- أوكي.
- طيب اطلعي على السرير وأنا هنادي الممرضة تيجي  
تساعدك.
- ضغطت (أمل) على الجرس، فحضرت (أميرة) وذهبت  
لمساعدة المريضة وبعد مرور عدة دقائق:
- إحنا جاهزين يا (دكتورة).
- قبل أن تترك (أمل) مكتبها نظرت نظرة خاطفة إلى هاتفها  
المحمول لترى إن كانت هناك أي رسالة من (أسماء) ولكنها  
لم تجد شيئاً، فتوجهت إلى المريضة ثم وضعت الجِل على  
بطنها ثم مجس السونار:
- نقول بسم الله الرحمن الرحيم  
وبعد مرور عدة ثوان:
- بشريني يا (دكتورة)!
- كده نقدر نقول مبروك ... حامل في آخر الشهر  
الثالث وخلص تقريباً داخلة على الرابع والبيبي في  
وضع طبيعي الحمد لله.
- فرحت المريضة بشدة وعانقت (أمل):  
- ربنا يعلم إني بحبك زي أختي.
- ربنا يخليك يا حبيبي ده شرف ليا... عقبال ما تلبسي  
هدومك هكتبلك كام تحليل نعملهم مبدئياً علشان نضمن  
على صحتك، وبعدين هقولك هنمشي إزاي في نظام المتابعة  
والتغذية ومعاد الفيتامينات وكل التفاصيل دي. وطبعاً إنت  
معاك رقمي لو احتجت أي حاجة في أي وقت.

انتهت المريضة من ارتداء ملابسها وأخذت رويشة التحاليل وودعت (أمل):

- مع السلامة يا (دكتورة) وربنا يفرح قلبك.
- ألف مبروك يا حبيبتي.
- توالى دخول المرضى كالمعتاد لعدة ساعات متواصلة. ومع خروج آخر مريضة، رن هاتف العيادة:
- ألو! (دكتورة أمل) عندنا حالة طارئة ومحتاجين حضرتك.
- حالاً هتلقيني عندك.
- نزلت (أمل) مسرعة إلى قسم الطوارئ في الدور الأرضي:
- فين الحالة؟
- في أوضة رقم (5) وكله جاهز مستنيين حضرتك.
- ذهبت (أمل) إلى غرفة التعقيم ثم دخلت غرفة العمليات والمريضة تصرخ، كانت المريضة متألماً أكثر من المعتاد ويبدو عليها آثار نزيف شديد:
- (منى)؟؟ إيه اللي حصل؟!
- الحقيني يا (دكتورة) مش قادرة... أنا عملت حادثة وحاسة إني خلاص بموت وخايفة على الجنين!
- أرجوكِ بلغوا (معتز)!
- حبيبتي اهدي متخفيش إحنا كلنا معاكِ وأنا مش هسيبك وهتبقني كويسة إنتِ والبيبي، وأهي الممرضة رايحة تبلغهم يكلموا (معتز) وأنا هولدك قيصري حالاً وطبيب التخدير خلاص بيستدعوه دلوقتي.

وصل طبيب التخدير وسأل المريضة بضعة أسئلة ثم خدرها. كانت عملية الولادة مرهقة للغاية ومرت لحظات

كانت تُنذر بخسارة الأم أو الجنين، ورغم ذلك تمكنت (أمل) من إنقاذ الأم ولكن الطفل واجه صعوبات في التنفس.

ظلت (أمل) بجانب الأم حتى تأكدت من استقرار حالتها ووصول زوجها. بدأت الأم تفيق وأخذت تنظر في كل ركن بالغرفة باحثة عن وليدها ثم نظرت إلى (أمل) بوهن وخوف شديدين:

- مات؟
- (منى) حبيبتي متخفيش أهم حاجة نطمئن عليك، ومتقلقيش دكتور الأطفال مع البيبي بيطمنا عليه زي ما بنطمن عليك دلوقتي.
- قالتها (أمل) وهي في شدة القلق على الطفل، وكانت تلك اللحظات أكثر ما تكرهه (أمل) في مهنتها. قطع صوت (معتز) لحظات شرودها وهو يجري تجاه (منى) فزعاً:
- (منى) إيه اللي حصل؟ إيه اللي حصل يا (دكتورة)؟
- متقلقش على (منى) هي بخير الحمد لله وحالتها بدأت تستقر والبيبي معاه دكتور الأطفال عشان نطمئن.... بعد إذنكم يا جماعة.

خرجت (أمل) وأغلقت الباب وراءها متجهة نحو الغرفة الموجود بها الطفل لتعرف مستجدات الحالة من الطبيب حتى تكذب ظنونها. وفي تلك الأثناء بدأت (منى) تروي ما حدث:

- كنت زهقانة ومخنوقة قلت لما أنزل أجيب حاجة البيت اللي ناقصة وأكلمك وأقولك إني خلاص جبتهم. وأنا في الطريق جت عربية عكسي بسرعة

جداً، وإنّ عارف من ساعة ما حملت وأنا حركتي  
تقلت فملحقتش أطفادها فخبطتني ومش فاكرة أي  
حاجة بعد كده.

أغمض (معترز) عينيه غاضباً وهو ينظر إلى أعلى:  
- نقول الحمد لله ... الحمد لله على كل حال.

طرقت (أمل) باب غرفة ثم دخلت فوجدت الطبيب وفريق  
التمريض يتحدثان:

- إزيك يا (دكتور أحمد)؟ طمني على الحالة.
- للأسف يا (دكتورة) زي ما توقعت ... الرئة عنده  
نموها مكتملش وده طبعاً عامله مشكلة في التنفس  
لأنه واضح إنه اتولد قبل معاده، وهنحتاج نحطه في  
حضانة ونراقب حالته.
- خير إن شاء الله... شكراً يا (دكتور أحمد).
- ده واجبي.

ذهبت (أمل) لإخبار والدي الطفل أنه ما زال على قيد الحياة  
ولكنه سيحتاج أن يوضع في الحضانة بعض الوقت. وأثناء  
سيرها في الممر المؤدي إلى غرفة (منى)، أوقفها شاب يبدو في  
أواخر العشرينيات، متوسط القامة، شعره أسود ناعم ليس  
بالقصير ولا الطويل، لحيته كثيفة قصيرة، من النوع الذي  
يجذب الفتيات وتزيده وسامةً. باغت الشاب (أمل) قائلاً:

- طمئني المريضة (منى) والمولود عاملين إيه؟
- معلش أنا آسفة بس حضرتك مين؟
- حقك الصراحة تنسيني... أنا دكتور التخدير (بسام  
الجوهري).

- أنا متأسفة جداً جداً يا (دكتور بسام) بس واضح إنك جديد في المستشفى وأنا النهارده يومي كان صعب... اعذرني بجد.
- أولاً اسمي (بسام) وبس، أنا مبحبش الشكليات ونفخة الدكاترة دي يا دكتورة (أمل).
- هههههه... والله كويس إنك عرفت تضحكي! خلاص وإنك كمان قولي (أمل) وبس.

سارت (أمل) تجاه الغرفة لإبلاغ والدي الطفل بحالة مولودهما، ولكنها نادت الممرضة المسئولة عن الحالة أولاً. طرقت الممرضة الباب مرتين قبل الدخول:

- (دكتورة أمل) عاوزه تظمن على الحالة.
- إزيك يا (منى) دلوقتي؟
- الحمد لله يا (دكتورة) طمنينا أرجوك.
- البيبي عايش متخفوش هو بس عشان اتولد قبل معاده عنده مشكلة في الرئة... نموها لسه مكتملش فلازم يتحط في حضانة، ودي مشكلة طبيعية جداً بالنسبة للأطفال اللي بيتولدوا قبل معاده، وصدقوني هيبقى كويس بإذن الله.

وفي تلك الأثناء تذكر (بسام) أنه لم يعرف أي تفاصيل عن الحالة من (أمل)، ولم يطمئن على الحالة بعد. ذهب (بسام) وسأل التمريض عن رقم غرفة (منى) وقرر الذهاب بنفسه إلى هناك. وعندما فتح الباب اصطدم (بأمل) خارجة من الغرفة:

- (أمل)... أنا آسف!
- فزعت (أمل) ولكنها هدأت أخيراً:

- ولا يهملك يا (بسام).
- أنا كنت عاوز بس أطمئن على الحالة.
- طيب براحتك اتفضل.
- بس لو ممكن تستنيني عشان عاوز أشوف الطفل كمان.
- نظرت له (أمل) نظرة طويلة ما بين الاستغراب والاحترام:
- ماشي هستناك.
- وبعد مرور عدة دقائق خرج (بسام) من الغرفة وذهب مع (أمل) إلى غرفة المولود حيث أشارت له (أمل) قائلة:
- هو ده الطفل يا (بسام) لسه ملحقوش يسموه.
- شكله يقطع القلب مش بستحمل أشوف الأطفال بالمنظر ده.
- إنت غريب أوي!
- ليه؟
- معرفش إحساسك بالأطفال واهتمامك بالمرضى وقلقك عليهم اللي مش مُصطنع... أنا بقالي سنين في المهنة دي مشفتش كده!
- الأغلبية اللي بتقولي عليها بتغطي علينا بس اللي زيي وزيك لسه موجودين كثير، ومن غيرنا مكنش هيبقى في مرضى لسه أصلاً عايشين.
- التفتت (أمل) إلى وجه (بسام) وابتسمت له:
- أنا لازم أمشي... فرصة سعيدة يا (بسام).
- أنا أسعد مع السلامة!

(4)

دموع (أمل) أيقظتها مبكراً لأن قلبها كان مليئاً بالكثير من المشاعر المتضاربة، وفي الوقت نفسه كانت لا تشعر بأي شيء على الإطلاق. مسحت (أمل) دموعها وفتحت باب غرفتها بصوتٍ خافتٍ واتجهت ناحية الشرفة لتجلس وحدها. شعرت (أمل) ببرودة مخاوفها ووحدتها مما زادها ألماً، فوضعت يديها على ذراعيها لتضم نفسها لأنها لا تجد من يحنو عليها.

بدأت (أمل) تتذكر ما دار بين (والدها) و(والدتها) قبل يومين، وكيف أن صوتهما المرتفع جعلهما لم يدركا وصولها وسماعها ما دار بينهما... ما كان يجب أن تعرفه وما كان يجب أن تسمعه!

- (حسين) إنت فين؟؟ ولا بترد على موبايك ولا بتيجي بيتك غير آخر الليل... في إيه لده كله؟
- الشغل.
- شغل؟!
- اسألني نفسك أنا ليه مُضطّر أطحن نفسي في الشغل للدرجة دي!
- (حسين)!! أنا قولتلك مليون مرة الباقي من فلوسي أنا حطاه لولادي في البنك، وإنت لسه بصحتك وبتشتغل ولو حبيت عندك فلوس تفتحلك مشروع وإنت مرتاح.

- وهو أنا يعني مليش نفس أحوش فلوسي أنا كمان يا (سنا)؟ يعني على رأيك على الأقل للولاد؟
- إنت عاوز توصل لإيه؟
- ولا حاجة.
- (حسين) ... الحياة مش كلها فلوس، وأنا مش عارفة إحنا بنعمل في بعض كده ليه... (محمود) و(أمل) لسه محتاجين حسنا معاهم في الدنيا.
- لأ يا (سنا).. هي الحياة فعلاً كلها فلوس وإنت اللي علمتيني كده، ومن زمان وإنت بتحاولي تكسريني مرة قدام أهلك عشان يوافقوا عليا، ومرة قدام الولاد عشان يفتكروا إني بعرف أجيب هدايا مُحترمة تليق بيهم!
- بقى أنا عملت كده يا (حسين)؟ لما نبقي في بداية حياتنا وأحط فلوسي على فلوسك عشان نكون حياتنا تعتبر إني بديلك من فلوسي عشان تبان بمستوى مُعين قدام أهلي؟ ولما تكون بتفحت نفسك في الشغل، وبتنسى كل سنة عيد ميلاد الولاد من صغره وأجبلهم هدايا وأقولهم دي من أبوكو اللي مش ناسيكوا أبقي بكسرك قدام ولادك؟ تقدر تقولي إمتي عيد ميلاد (محمود) أو (أمل) أو حتى أنا!!
- طبعاً لازم أكون الغلطان.
- أنا اللي غلطانة إني عودتك متشلش المسئولية كاملة.
- شايقة إنت بتكلميني إزاي؟ كل ده عشان (أبوك) ذو شأن في المجتمع وأنا (أبويا) على قد حاله! الله أعلم (أبوك) جاب الفلوس اللي على قلبه دي أصلاً منين!

- لا لا لا ... أنا مش مصدقة اللي بسمعه ولا مصدقة اللي بتقوله على (بابا) ... الراجل اللي اعتبرك ابنه وافتكرتك بتعتبره في مقام (أبوك) الله يرحمه!
- ده (حسين) اللي إنت عملتیه بعجرفتك عليه... بس الزمن دوار، دلوقتي أنا صاحب النفوذ وإنتِ بعيالك اللي محتاجني!
- مهو ده واجبك!
- واجبك تشاركييني، كرم مني إني مش بطالبك بكده حالياً رافة بسنك مش أكثر إنما ملحوقة... (أمل) بنتك شكلها طالعة كسيبة وواجبها تساعد (أبوها).
- ده لو (أبوها) عاجز أو محتاج!
- يكفي إني (أبوها).
- مهو يكفي فعلاً!
- وعشان كده أنا قررت إن (أمل) حلال على (صالح) عشان يبقى زيتنا في دقيقنا زي ما بيقولوا!
- وفي تلك اللحظة، دخلت (أمل) الغرفة فجأة:
- إيه ده هو (صالح) ابن عمتي هيتجوز؟
- أيوه يا حبيبة (بابا)!
- ألف ألف مبروك... أعرفها؟
- طبعاً... إنتِ!
- لم تكن (أمل) في مزاجها المعتاد وكانت مقتضبة إلى أقصى حد ولاحظ الجميع تغير مزاجها ذلك النهار:
- صباح الخير يا (دكتورة).
- (حاج إسماعيل) اسبرسو دوبل من فضلك.
- حاضر يا (دكتورة).

- سألت (أميرة) (حاج إسماعيل):
- هي مالها (الدكتورة) النهارده؟
  - مش عارف يا بنتي بس هي مش في الفورما خالص... ربنا يستر.
  - طب الحمد لله إن عدد المرضى قليل.
  - كانت (أمل) على وشك الانتهاء من المرضى عندما حان وقت دخول آخر مريضة.
  - (بسام)؟؟؟
  - هو أنا دائماً بأظهرلك في الوقت الغلط ولا الغلط فيا ولا إيه بالظبط؟
  - لأ هو الغلط فيا أنا تقريباً. وكمان متوقعتش خالص إنك تكون آخر مريض خصوصاً إن زي ما إنت عارف كل المرضى بتوعي ستات.
  - على فكرة أنا راجل وسيد الرجالة!
  - هههههههه والله ما قصدي!
  - أنا بهزر معاكِ وبعدين ما شاء الله عليكِ ضاربة 3 اسبرسو بس في يوم واحد... مش تقوليلي طيب؟
  - إنت مش ممكن على فكرة... إزاي بتعرف تضحكني وأنا بجد مش قادرة؟ وبعدين إنت محسني إني مدمنة واتقفشت وأنا بأضرب!
  - لا... لو على القفش فأنا اللي اتقفشت!
  - اتقفشت إزاي؟
  - أقصد اتقفشت كمريض! أي نعم أنا راجل ومش متجوز ولا خاطب بس دافع فلوس بره ولازم يتفتحلي فايل برضه.

- طيب يا سيدي، بس مبدئياً كده فلوسك مش راجعة وأهو مسكت القلم وأهي روشتة كمان باسمك.  
- أنا جايلك بخصوص طفل.  
- طفل؟ تقصد ابن مدام (منى)؟  
- لأ! طفل تاني خالص... مش إنتِ جزء من مهنتك بتكتشفي وجود طفل أصلاً في جسم بني آدمة وبتابعي نموه لحد ما بيكبر وبتخرجيه للحياة من بعد ربنا؟ نظرت له (أمل) وتبدو عليها علامات الدهشة وهو مستمتع بتلك النظرة في عينيها ويبادلها نفس النظرات، وقالت له متعجبة:

- أنا عمري في حياتي ما فكرت فيها كده رغم إني بعشق الأطفال ولو أطول أوهبهم روجي هعملها...  
- (أمل) هقولك كلمتين وهمشي ... أنا الطفل اللي جايلك عشانه النهارده مع إني متأكد إن لحد اللحظة اللي إحنا فيها دلوقتي إنتِ مش شيفاني! أنا الطفل اللي عاوز يكبر على إيديك وتوهبيه الحياة.  
سقط القلم من يد (أمل) وشعرت بقشعريرة غريبة صعقت جسدها بالكامل، وكأن هناك من عانقها أخيراً... ذلك العناق الذي بحثت عنه طويلاً ولم تجده.  
- بس لعلمك يا (أمل) أنا أصلاً مش موافق لازم تتحيلي عليا شوية عشان بتكسف!  
ضحكت (أمل) بشدة وكانت تحاول جاهدة أن تجد الإجابة المناسبة لمثل هذا الموقف:  
- (بسام) أنا ....

- عيب على فكرة لازم تهتموا بنظافة المكان إحنا  
مستشفى محترمة. ابقي شوفي الحاجة اللي على  
الكرسي... أنا طالع آخذ فلوسي من بره.  
خرج (بسام) ضاحكاً بسبب توتر (أمل) الذي منعها حتى من  
رد السلام، وراقبها وهي تركض مسرعةً إلى كرسيه. وجدت  
(أمل) ورقة صغيرة مكتوباً عليها:  
"أنا أحسن منك وجبت رقمك، وده رقمي عشان متقوليش  
رقم غريب معرفوش وما ترديش." - بسام -

شاهدها (بسام) وهي تبتسم في خجل، ورأى في عينيها حزناً  
دقيقاً لم يعرف سببه وإن كان قد شعر به منذ لحظة لقائهما  
الأول ولكنه ذهب مُسرِعاً عندما شعر أنها تستعد للخروج.  
وفي طريقها للخروج اتصلت (أمل) (بأسماء)، وكالعادة لم ترد  
ولم يكن في بال (أمل) سوى القلق على صديقتها المخفية  
منذ أيام وإن كان هذا طبعها. وفي حقيقة الأمر، (أسماء)  
أحبت (أمل) بالفعل، ولكن قلبها لم يكن أبداً عادلاً.  
ركنت (أمل) سيارتها بجانب الشارع وشعرت أنها لا تريد  
الرجوع إلى المنزل من شدة حماسها لما حدث، فقررت  
الاتصال بصديقاتها المقربات اللاتي كنَّ أقل قرباً من  
(أسماء):

- إزيك يا (داليا)!  
- حبيبتي يا (أمل) عاملة إيه؟  
- أنا الحمد لله كويسة ما تيجي نتقابل لو فاضية؟  
إنتِ وحشاني جداً وزهقت من كلامنا بس على  
الشات.

- فيك الخير... إنتِ اللي دائماً بتسألني عليّ والله،  
بس بصراحة مكسلة أنزل!
- ولا حتى بكره؟
- لا احتمال يبقى عندي مشوار كده بس هو لسه  
مش مؤكد ولو اتلغى احتمال أروح الكوافير عاوزه  
أعمل شعري.
- ماشي يا (داليا) ... مبسوطه إني سمعت صوتك.
- باي يا (أمل).
- قررت (أمل) أن تتخطى أي شعور أحست به في تلك اللحظة  
وهي تحدث نفسها:
- مش عاوزه أسمع ولا كلمة! مش هَيأس! أنا هكلم  
(ندی) هي اللي هتُظبط معاها إن شاء الله
- ألو! إزيك يا (ندی) وحشاني جداً
- والله؟ أمال مبتسألينش ليه؟ فينك؟
- كانت (أمل) على وشك أن تفقد أعصابها وحاولت جاهدة  
انتقاء ألفاظها:
- طب نفترض إني مسألتش - وده مش حقيقي -  
متسألينش عليا إنتِ ليه؟
- مهو... مهو كان عندي ظروف بقي!
- المهم تيجي نتقابل؟
- أممممم... نتقابل؟ لا والله مش عارفة أحدد  
بصراحة هينفع ولا لأ.
- تمام يا (ندی) سلام.
- باي يا (أمل) وابقى اسألني... ها!
- لم تتمكن (أمل) من إسكات نفسها أكثر من ذلك:  
"لسه مش عاوزه تسمعي ولا كلمة؟!"

(5)

كانت (أمل) على وشك أن تنام عندما وصلتها رسالة من  
(بسام) على الواتس آب:  
"إنّ متراقبة"  
ضحكت (أمل) في خجل وكتبت له: "مجنون"

وفي صباح اليوم التالي، اتصلت (أمل) (بأسماء) وتحققت  
المعجزة وردت عليها:

- (أمولة) عاملة إيه يا حبيبي؟ وحشتيني!
- إنّي أكثر بكثير ... طمني بس المهم إنّي كويسة؟؟
- قلقتيني عليك جامد المرة دي!
- لا لا يا حبيبي كويسة متقلقيش.
- أنا قلّت يا إما عندك مشكلة يا إما عندك ضغط أوفر
- أوي في الشغل، كده تقلقيني عليك؟!
- الحمد لله مفيش مشاكل والشغل كان العادي
- مَقْدَرش أقول كان فيه ضغط! هو أنا محكتلكيش؟
- صممت (أمل) ثم ردت عليها مسرعةً:
- على إيه؟
- الواد المَز اللي حكتلك عليه عاوزني أقابله بكرة بعد
- الشغل وشكله هيفاتحني في الموضوع بس أنا هفهمه
- كل حاجة من بدري زي ما قولتيلي.
- ربنا معاك المهم تكوني مبسوطه.
- ربنا يخليك يا حبيبي ويسعد قلبك.
- مالك؟ صوتك مش عاجبني.

- لا عادي مفيش، ممكن بس من ضغط الشغل.
- مش عليا الكلام ده قوليلي حاسة بيايه؟
- معرفش أنا فجأة حسيت إني مخنوقة ووحيدة ومتكتفة يمكن الوقت الوحيد اللي بنسى فيه كل المشاعر دي بيبقى وأنا بأشتغل.
- مخنوقة ومتكتفة ممكن أفهمها بس وحيدة؟ وأنا رحت فين؟!!! ده أنا أزعل بجد؟؟
- مش قصدي هو إحساس كده مش عارفة أوصلهولك.
- لازم نكلم في الموضوع ده ونشوفله حل ومش محتاجة أقولك يا حبيبي إنتِ تكلميني في أي وقت وهتلاقيني طبعاً!
- آه آه طبعاً متأكدة من كده!

عندما وصلت (أمل) إلى المستشفى، طلبت قهوتها من (حاج إسماعيل) وانتظرته حتى يبدأ دخول المرضى. فتحت (أمل) باب غرفة عيادتها وهي منغمسة في الحديث مع مريضة اتصلت بها ثم سمعت طرقاتاً على الباب:

- لا لا متخفيش ده طبيعي بس لو اتكرر تاني ساعتها كلميني... اتفضل يا (حاج إسماعيل).
- وعندما أغلقت (أمل) هاتفها المحمول ونظرت إلى الباب، وجدته (بسام) وليس (حاج إسماعيل)!
- (بسام)!
- برضه؟
- إنت بتعمل إيه هنا؟

- مش قولتلك إنتِ متراقبة فكراني بهزر ولا إيه؟ خلاص على العموم أنا كنت جاي أصبح عليكِ أنا آسف لو ضايقتك.
- (بسام) إستنى... أنا آسفة لو ضايقتك، أنا عبرت عن نفسي بأسلوب غلط.
- يبقى تعوضيني، مبقبلش الأسف حاف؟
- تؤمر بإيه حضرتك؟
- لو خلصنا بدري نتنعشى سوا في المكان اللي يعجبني أنا، موافقة؟
- هههههه طيب يا سيدي موافقة.
- فرح (بسام) بشدة ثم دق (حاج إسماعيل) الباب:
- ادخل يا (حاج إسماعيل).
- يلا سلام يا (أمل).
- باي يا (بسام).
- كان يوم (أمل) طويلاً ما بين مرضى في العيادة وعمليات ولادة، ولكنها شعرت أنها لا بد أن تفي بوعدھا (لبسام)، خصوصاً أنها أرادت أن تحسن صورتها أمامه. كما أنها لم تستطع أن تتجاهل شعورها بالفضول للتعرف على هذه الشخصية التي اقتحمت حياتها بدون سابق إنذار، وفجأة سمعت صوته:
- شايقة أنا مستنيكي من بدري إزاي؟
- إنتِ بتطلع منين بجد يا (بسام)، وعرفت منين إن دي عربيتي أنا كنت لسه هكلمك؟
- هههههههه لا حول لله يا رب ما قولناك إنتِ متراقبة... بصي بقى عشان أنا جعان وعاوز آكل أكلة حلوة، ليك في الشرقي؟



- لا ده إنتِ هتحكيلي كل حاجة بالتفصيل مش هتكلي دماغي بالحببتين دول، ويلا بقي اتلحلي ونعمل جروب ونعرف (بسام) على (محمد) ونخربها.
- يا نهار أبيض عليكِ خلاص وصلتها للدرجة دي. إنتِ بكرة وراكِ إيه لو حبيننا نتقابل؟ أكيد هتكوني حرام مضغوطة في الشغل نخليها الويكِ إند أحسن؟
- خليني أشوف مغامراتي مع (محمد) كده الأول!

أنهت (أمل) مكالمتها مع (أسماء) وشغلت الراديو أملاً في عدم التفكير في أي شيء والحفاظ على ما تبقي من تركيزها للقيادة، ولكن كالعادة بركان أفكارها لا يهدأ وإن كان يبدو كامناً.

وبعد مرور نصف ساعة، وصل (بسام) و(أمل) إلى المكان المنشود وساعدهما السائس على ركن سيارتهما ثم اتجها إلى مدخل المطعم:

- من بره باين الديزاين بتاعه شرقي أوي ... ياااه واحشني الجوده جداً.
- طب دي علامة مبشرة لسه لما تدخل جُوه كمان، هتحببه أكثر.

وجدت (أمل) العديد من الصور الفوتوغرافية لكثير من الشخصيات القديمة من فنانيين وعظماء، وأدوات وآلات عتيقة.

- إحنا كأننا منفصلين عن العالم.
- هنفصل عن العالم أكثر بعد الأكل.
- نظرت له (أمل) ضاحكة:
- إنتو الرجالة كده كلكم همكم على بطنكم دائماً.



- هسربها بس علشان إنتِ اللي حطّيتها.

ابتسمت (أمل) في خجل ووجهت نظرها إلى النيل وبدأت تتأمل فيه ثم فجأة سمعت (بسام) يقول:

- أنا (بسام الجوهري)... عندي 29 سنة، ويتيم الأب والأم، ومليش إخوات، وعایش في شقة في مصر الجديدة، وعمري ما حبيت قبل كده. الحاجة اللي بتهون عليا حياتي هما صُحاي، وأكثر حاجة بحبها هي شغلي، عشان كده عليت فيه بسرعة. كتير أوي بحس بالوحدة وبسأل نفسي ليه ربنا لسه مخليني عایش؟ بس لما بنزل المستشفى وأخدر الناس ويصحوا تاني بقول يمكن ربنا بيخدرنا كتير ومش بيخلينا نشعر لا بسعادة ولا بحزن عشان يحيينا من جديد لما ياذنلنا بكده، ولحظة ما شُفّتك اتأكدت من ده وشُفت فيك جزء من أمي اللي مقضتس معاها غير سنين قليلة أوي. وقبل ما أفكر أقربلك كنت خايف إني ملاقيش جوايا حاجة أقدمهالك وأبقي بَخدك وسيلة لإشباع احتياج جوايا وبس. إنما لما اتأكدت إن الموضوع أكبر من كده بكتير لقيت نفسي بأتصرف بطريقة أنا نفسي مش فاهمها.

ترقرقت عينا (أمل) بالدموع وشعرت أنها تريد أن تضمه بشدة إلى قلبها للأبد، ثم قالت له بصوت خافت:

- إنتِ عارف يعني إيه تحكيلي كل الكلام ده وبالسرعة دي؟

- عارف وعاوزك إنتِ اللي تعرفي.

وفي تلك الأثناء، جاء الجرسون بالأطباق وسعد (بسام) جداً بتلك اللحظة.

قضت (أمل) وقتاً سعيداً للغاية برفقة (بسام) واتفقا على ضرورة تكرار هذه التجربة مرة أخرى. وبعد أن فرغا من تناول الطعام ودعا بعضهما وغادر كل منهما إلى منزله وعندما وصلت (أمل) إلى المنزل وذهبت إلى غرفة (والدتها) وقبلتها على جبينها، ثم اتجهت إلى غرفتها وبدلت ملابسها واستعدت للنوم. حملت هاتفها المحمول لتضبط المنبه وفي تلك اللحظة، أرسل لها (بسام) رسالة:

- وصلت؟
- الحمد لله بقالي تلت ساعة تقريباً
- انبسطت؟
- أوي
- شكراً
- على إيه؟
- عليك

(6)

استيظت (أمل) في اليوم التالي وجلست على سريرها حاملَةً هاتفا المحمول وهي في حالة من التوتر الشديد لم تشعر بها من قبل حتى قرعت (والدتها) باب الغرفة:

- (أمل) مش هتتغدي؟
- شكراً يا (ماما) مش جعانة!
- إنتِ حتى مفطرتيش؟؟ إنتِ فيكِ حاجة؟
- لا يا (ماما) متقلقيش مفيش حاجة، إرهاب بس من الشغل ومقريفة شوية.
- على (ماما)؟!
- هههههههه... قَرُوبَة إنتِ.
- يلا تعالي نتغدى ونتكلم وإحنا بناكل، ده أنا بستني يوم أجازتك بفاغ الصبر.
- نهضت (أمل) من سريرها فوجدت (والدتها) تنظر إليها نظرة تحمل العديد من المعاني:
- على فكرة بحس بيك كل يوم لما تبوسيني بعد ما ترجعي البيت، وأصلاً مبعرفش أنام قبلها عشان بأعرف إنك اتأخرتِ ولسه مجتيش فبفضل صاحية قلقانة عليكِ.
- نظرت لها (أمل) في دهشة واستغراب:
- بتخميني يا (ماما) وبتعملي نفسك نايمة!
- هههههه... بس يا بنت حد يقول (لمامته) "بتخميني".

- يلا يلا نeced... ده إنتِ فتحتِ نِفسِي. وكمان طلعتِ  
عاملة كل الأكل اللي بحبه بس طمني عليك الأول.
- مفيش جديد اللي بنام فيه بصبح فيه... (أبوك) هو  
هو ده إن مكنش بيزيد سوء و(أخوك) ماشي على  
هواه ومبيحضرش محاضرات وأنا مش عارفة أعمل  
إيه وتعبت ومعدتش مستحمله، بس بقول الحمد لله  
إن ربنا معوضني بيك.
- قولتلك قبل كده إن الحل في إيديك بس إنتِ اللي  
مش راضية! وإنتِ يمكن متعرفيش بس أنا بحاول  
أكلم (بابا) كتير ومبيردش عليا، وبكلم (محمود)  
ومبيردش عليا برضه، ولما أرجع البيت يا بلاقيه نايم  
يا خارج!
- طب سيبك منهم دلوقتي احكي لي عنك إنتِ بقى يا  
مجرمة... أنا بعرفك من صغرك لما بيكون وراكِ  
حاجة وإنتِ أصلاً الوحيدة اللي متغيرتيش كتير.
- هو أنا أصلاً ليا غيرك في الدنيا أحكيه ويسمعني!
- آه المقاطيع صحابك! ازعلي مني براحتك بس  
افتكري دايماً إنهم مش زي ما إنتِ فاكرة وإنتِ  
مدياهم أكبر من حجمهم خصوصاً (أسماء) وفي يوم  
هتقولي (ماما) قالت.
- يا خوفي منك يا (سنا)! بصي يا ستي من 3 أيام  
تقريباً جه دكتور تخدير جديد عندنا في المستشفى  
واتعاملنا مع بعض في حالة طارئة زي أي حالة  
بنتعامل معاها، بس الفرق إن هو كان مهتم جداً  
بالمريضة والمولود وفضل متابع الحالة، وده كان  
غريب جداً بالنسبالي، وبعدها عرفني على نفسه.

- وبس؟
- جاني تاني اليوم العيادة وقعد يقولي كلام كده معناه بطريقتة غير مباشرة إنه معجب بيا، وحسيت إنه مش مستني رد مني وسابلي رقمه وقالني إنه جاب رقم موبايلي... بصراحة هو دمه خفيف جداً وببستني تسببته كده عمر ما حد سبتهالي.
- وإيه كمان؟
- إمبارح جالي الصبح في العيادة وأنا من لخبطي من غير ما أقصد أسلوبي كان مش لطيف معاه وحسيت إني أخرجته وضايقتة فقلتلته إني هعوضه، فطلب نتعشى سوا لو خلصنا بدري. وفعلاً رُحنا اتعشنا وفجأة لقيته بيكلمني عن نفسه وأهله وصحابه وشغله ومشاعر كتيرة جواه ناحيتي وشُفت في عنيه كلام أكثر بكثير من اللي قاله، وبرضه مكنش مستني مني أي رد! حسيته كان بيحكيلي كده وخلص لمجرد إنه عاوزني أعرف عنه كل حاجة وبس.
- ابتسمت (والدتها) ونظرت إلى وجهها متعمدةً إخراجها بعض الشيء:

- وبعدين؟
- ضحكت (أمل) في خجل شديد:
- خلاص بقى يا (مأما) ما أنا حكيتلك كل حاجة!
- محكتليش أهم حاجة... إحساسك إنت ناحيته؟
- (بسام) بيرسم البسمة على شفائفي بمجرد ما بقول اسمه أو بفكر فيه أو بيكتبلي رسالة لدرجة إني بتلخبط جداً لما بشوفه، وبيان عليا إني مش عاوزة

- أتكلم معاه، ويمكن ده لإني مش عاوزه أعلقه بيا أو  
 مش عاوزه أتعلق أنا بيه.
- طب إنتِ شايفة شخصيته إزاي؟ وهو بيعاملك  
 إزاي؟
- من زمان مشوفتش بني آدم طاهر بالشكل ده، ماشي  
 بمبدأ العطاء بدون مقابل، ده غير قدرته العجيبة  
 على أنه يُوَصلي بأقصر الطرق الممكنة ... (بسام) هو  
 الحلم الجميل والسر الخاص بيا أنا لوحدي واللي  
 نفسي أحتفظ بيه للأبد بس خايفة إني أصدقه أو  
 أعيشه.
- وليه متقوليش إن ربنا أخيراً بعثلك حد شبهك يقدر  
 يفهمك؟
- يمكن فعلاً هو الوحيد اللي يَقْدِر قيمة كل لحظة بعد  
 اللي مر بيه في حياته، وأبسطها اللي بيحصل عندنا كل  
 يوم في المستشفى... في نفس اللحظة اللي بيتولد فيها  
 طفل جديد بنكون بنعلن خبر وفاة مريض تاني.
- وفي تلك الأثناء، أعلن هاتف (أمل) المحمول وصول رسالة  
 من (بسام):
- "افتحي باب الشقة"

(7)

تسمرت (أمل) مكانها ولم تدرِ ماذا تفعل وما يخبئ لها هذا  
المجنون. دخلت (والدتها) الغرفة بعد غياب (أمل) الطويل:

- إنتِ رُحِتِ فين؟

- الحقيني يا (ماما) ... (بسام) بعثلي رسالة بيقولي  
افتحي باب الشقة! أنا أهو بلبس أي حاجة بسرعة لإني  
مش عارفة هو باعتلي حاجة ولا ممكن يكون هو  
نفسه جه! ده مجنون ويعملها! روعي إنتِ كمان  
البسي أي حاجة بسرعة.

فرحت (والدتها) بالمغامرة التي تعيشها (ابنتها) والسعادة التي  
لم تُعْتَد عليها كثيراً. ركضت (أمل) تجاه الباب وفتحته  
لتكتمل مفاجأتها... وجدت (بسام) أمامها مرتدياً بدلة سوداء  
أنيقة تليق به للغاية حاملاً باقة من الورد الأحمر المتفتح .  
جحظت عينا (أمل) ووضعت يدها على فمها، وظل (بسام)  
يضحك على شكلها ورد فعلها:

- مش بتقولوا للناس اللي بتزوركووا اتفضلوا؟

- إيه؟ أه آه طبعاً اتفضل اتفضل.

خطا (بسام) خطوة واحدة فقط تجاه الباب ثم توقف:

- حاسس الورد مش عاجبك هزُوح غيره.

- بالعكس ده تحفة أنا مستنياك تدخل عشان أخطفه

منك مع إني مش عارفة وصلت لبيتي إزاي... يا

مجنون!

- مش قولتلك إنك متراقبة مش مصدقاني ليه؟

- طب يلا اتفضل ادخل.
- معلش أفري الكارت الأول عشان لو معجبكيش ألحق أكتب غيره قبل ما (طنط) تشوفه ونبقي في مشكلة.
- هههههههه... حاضر هشوف الكارت الأول.
- التقطت (أمل) الكارت من داخل البوكيه وقرأته ثم بدأت تظهر على حدودها علامات تجمع ما بين الخجل والفرح مما قرأت:
- "تتجوزيني؟"
- تركها (بسام) في عالمها الخاص وعدّلت هيئته ثم دخل إلى المنزل ووجد (والدتها) فبادرها بالسلام:
- مساء الخير يا (طنط).
- مساء الخير يا (ابني).
- أنا (بسام الجوهرى) دكتور تخدير زميل (أمل) في المستشفى.
- أهلاً وسهلاً بيك يا (دكتور بسام)! اتفضل!
- يا ريت حضرتك تقوليلي (بسام) من غير دكتور...
- ولا يهملك ... شوفي يا (أمل) (بسام) يحب يشرب إيه؟
- قهوة مضبوطة من فضلك.
- أي نعم عندي الضغط، بس يلا من نفسي خليههم 3 قهوة يا (أمل).
- طب (والد أمل) مش هيشرب معنا القهوة... ولا أنا جيت في وقت مش مناسب؟
- صمتت (أمل) فقررت (والدتها) أن ترد بالنيابة عنها:
- (أبوها) مسافر بحكم طبيعة شغله، ادعيله ربنا يقويه أصله بيتعب أوي!
- كتمت (أمل) ضحكتها وذهبت إلى المطبخ لتحضير القهوة:

- فرصة سعيدة يا (ابني).
- أنا أسعد يا طنط... بصراحة أنا مشفتش بنت زي بنت حضرتك، وعشان كده أنا قُلت لازم أتعرف على العيلة العظيمة اللي جابت وربت آنسة فاضلة زيها.
- ربنا يكرمك يا (ابني)... أنا (أمل) دي اللي طلعت بيها من الدنيا.
- ربنا يخليهالك يا رب... (طنط) أنا مش بتاع لف ودوران، وبما إن (والدتي) متوفية يشرفني إنني أعتبر حضرتك في مقامها.
- الشرف ليا يا (ابني)... اتفضل أنا سامعك.
- أنا بَجِب (أمل) وعاوز أتجوزها... أنا شبه جاهز وعندني الشقة الحمد لله وجاهز لكُتب الكتاب كمان، بس لو ممكن نستني على الفرحة شوية لحد ما أظبط أموري أكثر عشان أحس إنني حقيقي موفر حياة كريمة تليق (بأمل).
- إنت فاتحت (أمل) في موضوع الجواز ده؟
- بشكل مباشر لأ، بس أنا حاسس إنها إن شاء الله هتكون موافقة.
- يبقى الجواب عند (أمل) مش عندي، وأنا عن نفسي موافقة، شكلك ابن حلال.
- ربنا يبشرك بالخير يا (طنط) بس هزِعِجك في آخر سؤال... أنا ممكن أحدد معاد رسمي أقابل فيه والد (أمل)؟
- خلي (أمل) تجاوبك أحسن على السؤال ده يا (ابني).

خرجت (أمل) من المطبخ حاملة صينية القهوة ووضعتها على الطاولة وهي تبتم بشدة (لبسام) وهو يغمز لها بعينه، وكانت (والدتها) تنظر إليهما في بهجة ولكنها تتصرف وكأنها غير منتبهة لهما.

- (أمل) خدي قهوتك إنتِ و(بسام) واشربوها بره في البلكونة... (بسام) عنده كام سؤال إجابتهم عندك مش عندي.
- حاضريا (ماما).
- عن إذذك يا (طنط).
- خرج (أمل) و(بسام) إلى البلكونة وفي طريقهما إلى هناك:
- هو إنتِ جميلة أوي كده في كل حالاتك؟
- اتلم يا (بسام) وإلا هتندّه ماما.
- ههههههه... هتندهي ماما؟ حسيت إننا في ابتدائي أوي.
- ههههههه... تصدق صح!
- طب يلا نقعد عشان أنا عاوز أدوق قهوتك.
- وأنا كمان عاوزة أعرف رأيك فيها.
- لأ مهو إنتِ فاهمة الموضوع غلط أنا مش هشرب قبل ما إنتِ تشربي!
- ده على أساس إني مش عارفة طعم قهوتي مثلاً؟
- لأ على أساس إنك هتشربها من إيدي المرة دي.
- قام (بسام) من كرسيه المواجه (لأمل) وجلس على ركبته اليمنى وأمسك فنجان قهوته وأخذ منه رشفتين ثم اقترب منها:
- (بسام)... إنتِ هتشربني وبس صح؟



(8)

- في صباح اليوم التالي، اتصلت (أمل) (ببسام) قبل أن تتحدث مع أي شخص أو تفعل أي شيء:
- ألو! صباح الخير يا (بسام)...
  - يااااا ده أحلى صباح... مصدقتش عينيّ لما قرّيت اسمك قُلت أكيد بأحلم.
  - لأ يا حبيبي مش بتحلم.
  - لا لا معلش ثانية واحدة... إنتِ قلتِ يا إيه؟
  - يا (بسام)...
  - لأ مقولتيش (بسام) إنتِ قلتِ حاجة ثانية.
  - لأ كده شكلك فعلاً بتحلم!
  - لأ أنا متأكد إني مكنتش بأحلم!
  - قصدك على "حبيبي"؟!
  - أيوووه هي دي ... أنا مش مصدق نفسي، ده أنا قُمت وبنُط على السرير زي العيل الأهبل.
  - هههههههه... يا أهبل.
  - مهو كله منك.
  - تيجي نفطر سوا عشان بحب أتغدى مع (ماما) في الأجازة لإني مش بلحق أتغدى معاها أيام الشغل؟
  - عاوزه نفطر سوا؟! إنتِ بتكلمي بجد؟؟؟؟؟
  - لو مش عايز خلاص... ممكن أغير رأيي وأفطر كمان في البيت.

- لأفطار إيه ده اللي في البيت!! أنا نص ساعة وهكون  
عندك ومش هتسوقي... هنروح بعربيتي وأنا اللي  
هوديك وهرجعك ماشي؟  
- اتفقنا.

ارتدت (أمل) أحد فساتينها الزاهية المشرقة ووضعت القليل  
من المكياج وكانت تبدو في غاية البساطة والجمال كعادتها،  
ولكن شعاعاً من النور كان ينبعث من داخلها يزيد بها  
وجاذبيةً. نزلت (أمل) إلى (بسام) فور وصوله:

- هنروح فين يا (أمل)؟ أنا جعان جداً.  
- أمممممم فيه كام مكان كده في بالي...  
- وحشتيني!  
- إحنا ممكن... ممكن نروح في ال.....  
- ههههههههه... بتبقي فظيعة وإنّ مزنوقة كده.  
- ماشي يا (بسام) افتكرها!  
- بس أنا بقى عاوز أسمع رد على اللي قولته...  
- إنت وحشتني أكثر.  
- الله أكبر!! أنا مش مصدق نفسي!!  
- هههههههه... هو أنا كنت معذباك للدرجة دي؟  
- خليني ساكت أحسن.  
- هههههههههههههه أحسن برضه... تيجي نطلع على  
التجمع؟

وصل (بسام) و(أمل) التجمع ورفض أن يختار المكان تاركاً  
الاختيار لها، وبعد اختيار الكافيه والأطباق والانتهاء من  
تناولها، بدأت (أمل) في الحديث عن بعض الأمور الجادة:

- من غير ما أعرف اللي دار بينك وبين (ماما) أنا عاوزه أكلم معاك في حاجة يا (بسام).
- اتفضلي.
- إنت سألت عن (بابا)، والحقيقة هو عايش بس ميت بالنسبالنا!
- عايش بس ميت؟!
- الاسم عايش إنما ملوش وجود في حياتنا، ولا يعرف عني حاجة ولا عن أخويا (محمود) ولا عن (ماما) ولا بقى يهمله أساساً أمرنا.
- بصراحة أنا مش فاهم حاجة يا (أمل)!
- أسوأ حاجة لما تكتشف إن أكثر حد كنت فاكرة بيحبك وفاركك هو أكثر واحد ناسيك... وأكثر حد يفرحلك هو أكثر حد ممكن يفرح فيك. كتير بنحب نقعد نتخيل قصة حب أهلنا قبل الجواز كانت عاملة إزاي بس أصعب حاجة توصل للحظة اللي تحس فيها إن مكنش فيه قصة حب من أصله!
- للدرجة دي؟
- منكرش إن ليا لحظات حلوة مع (بابا) بحب أفكرها، بس بعد آخر مرة سمعت بالصدفة نقاش بينه وبين (ماما) لما افتكروني مش في البيت... كل حاجة اتغيرت يا (بسام).
- إزاي؟
- اكتشفت إن (ماما) اللي كانت بتمثل عليا دور (بابا) وأنا صغيرة، بس نسيت إني في يوم هكبر وحقير الحقيقة بنفسي، هي اتعودت تعمل كل حاجة هو

- مفروض يعملها. أنا حسيت إن عمرهم ما حبوا بعض  
لأن كلامه كله كان عن الفلوس.
- فلوس؟
- رغم إن (بابا) بيشتغل في البورصة ومركزه كبير....  
عاوز باقي فلوس (ماما) اللي في البنك، وده سبب  
قلبته علينا. بس المصيبة الأكبر عارف عاوز يعاقبها  
بإيه ويرضي نفسه بإيه؟
- إيه؟
- يجوزني لابن عمتي (صالح) عشان أنا كسيبة وهو  
محتاج فلوسي!
- نعم؟!
- اللي سمعته يا (بسام).
- بس (طنط) قالتلي إنها موافقة عليا!
- (ماما) هتموت وتجوزني... رغم إنها على مستوى  
ثقافي عالي جداً إلا إن فكرها تقليدي جداً وراضية  
بالوضع ده كإنه بقى أمر واقع. يعني عاوزة تجوزني  
ورافضة الطلاق من (بابا) مع إنها قادرة تعمل ده  
عشان خايفة من كلام الناس وعاملة زي الست  
المغلوب على أمرها، وده بيضايقي أوي منها لأنها  
قوية جداً. ومعظم اللي في وضعها بيستمروا في  
جوازات فاشلة عشان النواحي المادية، بس الحمد لله  
إحنا معندناش المشكلة دي وأنا و(محمود) كبار.  
الحكاية دي بتزعني أوي من (ماما) رغم إنها أكثر  
إنسانة بحبها وبحترمها، بس مش هضحك عليك أنا  
بقيت بعتبر (ماما) جزء من المشكلة.
- طب وفين أخوك (محمود)؟ هو أكبر ولا أصغر منك؟

- (محمود) سنة أولى تجارة إنجلش، وكنا قريبين أوي زي الصحاب بس أول ما دخل الجامعة نسيني على الآخر وآخر الآخر كمان.
- أنا عارف إن تصرف (محمود) غلط وأنا مش بدافع عنه، بس معظم اللي في سنه للأسف بيعملوا كده. هو مش قصده يجرحك ولا بيكون حقيقي ناسيك، بس زي ما بيقولوا بتبقى السكينة سرقاه حبتين.
- أنا عارفة، بس هو وَحْشني أوي ومش عارفة السكينة هتفضل سرقاه مني لحد أمتي، ده غير إني عاوزة أطمئن عليه بجد وخايفة عليه.
- أقولك على فكرة؟
- قول!
- عرفيني عليه
- إنت بتكلم بجد!!
- جد الجد كمان... ساعتها متقلقيش عليه خالص لإني شاب زيه وهفهم لو في أي مشكلة، حتى لو إنت مخدتيش بالك منها. وبعدين لو بقينا أصحاب، ممكن نخرج أنا و(محمود) ونسيبك إنت في البيت ... عادي جداً!
- ههههههه... هي بقت كده!
- أيوه كده اضحكي... أنا مبسوط أوي إنك بتفتحيلي قلبك.
- قلبي اللي مبسوط بيك.
- (أمل) أنا ممكن يغمي عليا.
- هههههههههه... كويس أوي خلاص عرفت نقاط ضعفك كلها!

- فضحت نفسي!
- حاجة زي كده!
- طب حبيبتى فاضل حاجتين محكتليش عنهم؟
- إيه هما؟
- صحابك و قلبك...!
- تقصد يعني حبيت قبل كده؟
- أيوه!
- مقدرش أقولك إني حبيت قبل كده رغم إن كان ليا تجارب، بس كانت كلها سطحية جداً لدرجة إن محدش فيهم عرف عني كل اللي بحكيهولك ده.
- وبالنسبة لصحابي، أنا مبقتش عارفة هما بجد صحابي؟ أنا بقيت مقتنعة إني مينفعش أكون صاحبة وإن الغلط فيا أنا.
- ليه بتقولي كده؟!
- أنا مش متطلبة بزيادة، الفكرة كلها إنك تحس بالاهتمام وتحس إن في حد فاكرك بجد... ومن نفسه... وجنبتك فعلاً ومش بالكلام.
- طب وإيه الغلط في كده؟! أصلاً أي علاقة في الدنيا بتحتاج شغل من الطرفين، يعني يا الاتنين يهتموا بالعلاقة ويخافوا عليها يا إما العلاقة حتبقى مهزوزة وملهاش مستقبل وبتكون نهايتها مسألة وقت مش أكثر.
- من ساعة ما دخلت قلبي وأنا بطلت أتصل وبطلت أحاول إني دائماً أوصل لكل اللي حوليا حتى أقرب واحدة ليا (أسماء).

- إنتِ جميلة أوي يا (أمل) بس أنا خايف عليكِ من نفسك وتفكيرك الزايد في الناس اللي بينسيك نفسك، ولعلمك ده اللي بيسمحلهم ينسوكِ هما كمان.
- طول ما إنتِ جنبي متخفش عليا.
- أنا عمري ما هسيبك وهفضل جنبك، بس تفتكري ممكن (والدك) يعند في الموضوع بتاعنا والجوازة تبوظ؟؟!
- أنا كل اللي يهمني موافقة (ماما) ومباركتها.
- طب بمناسبة (ماما) شوفي عاوزه تشربي إيه عشان نمشي، متسيبهاش كل ده لوحدها.
- أنا ممكن أشرب كابتشينو.
- أنا هشرب شاي أخضر.
- أحضر الجرسون المشروبات وظلت (أمل) سارحة في (بسام) وهو يشرب وكأنها تدرس كل تفاصيله لأول مرة وهو مستمتع بتلك النظرات التي يراها لأول مرة:
- سرحانة فياً؟
- إيه؟
- كنتِ سرحانة فياً؟
- لا لا مش سرحانة فيك، ده كان فيه حد وراك كده كنت بشبه عليه.
- آآآه بتشبهه عليه! ماشي! طب مبتشربيش ليه؟
- طعمه وحش تحبي أجيبلك حاجة تانية؟!
- بالعكس ده طعمه حلو جداً، بس أنا نفسي في حاجة ومكسوفة أقولك.
- نفسك في حاجة؟ وكمان مكسوفة تقوليلي؟!
- آه مكسوفة أوي كمان!

- قولي وملكيش دعوة، أنا هودي وشي الناحية الثانية...
- ههههههههه.. لأ قرب أقولك في ودنك عشان مش عاوزه حد يسمعنا.
- الله!! هتقوليلي كلام عيب!!
- بس بقى.
- خلاص قولي.
- ممكن تشربني؟ محتاجة أوي أحس بالإحساس اللي حسيته وقت ما شربتني إمبراح.
- نظر (بسام) إلى وجه (أمل) المتورد من الخجل وهو سعيد:
- يلا قربي.
- يا مجنون مش قدام الناس.
- طب استني خدي الكريدت كارد بتاعي حاسبي بيه ومفتاح العربية عشان تستنيني هناك أوكي؟
- حاضر هستناك!
- دفعت (أمل) قيمة الفاتورة ببطاقة الائتمان كما طلب منها (بسام) ثم انطلقت صوب سيارته وانتظرته بالداخل. وبعد مرور عدة دقائق، ظهر (بسام) وبيده كوب آخر من الكابتشينو. فتح (بسام) باب سيارته وجلس على مقعده واقتربت (أمل) منه، فوضع يده تحت ذقنها وحمل بالأخرى الكوب. كانت (أمل) ترتشف الكابتشينو ببطء وكأنها أول مرة تتذوقه. وعندما اقترب المشروب من الانتهاء قالت:
- أنا ملاحظة إنك بتجود المرة دي وحاطط كمان إيدك الثانية تحت دقني.
- لا والله مكنش قصدي كنت خايف بس يدلِق عليك، أنا آسف مقصدتش أضايقك هشلها خلاص.
- ضحكت (أمل) بشدة وأمسكت بيد (بسام):

- خليها زي ما كانت.
- لم يصدق (بسام) ما حدث وما رأى في عيني (أمل) لحظتها، وتأكد أن احتياجها له أعمق بكثير من احتياجه لها:
- على فكرة أنا بَحْم وقاعد من الصبح بشربك بالراحة زيادة عن اللزوم.
- ما أنا عارفة وبَسْتَهبل.

وبعدما انتهت من شرب الكابتشينو، أخذ (بسام) يبحث في سيارته عن ورق مناديل لمسح شنب الكابتشينو المعتاد حتى وجدده، وأزال الشنب عن وجه (أمل) وهو ينظر بهدوء إلى كل جزء فيه ثم قال:

- بحبك.

(9)

بدأت (أمل) أسبوعها بحماس ونشاط شديدين، وكعادتها لم تستطيع أن تمنع نفسها من الاطمئنان على (أسماء) وإخبارها بمستجداتها رغم عدم ردها غير المبرر عليها منذ عدة أيام، ولكن (أمل) لم تعد تكثر كثيراً بعد ظهور (بسام) واهتمامه الدائم بها. وأخيراً ردت (أسماء) على مكالمتها:

- ألو! إزيك يا (أسماء) وحشاني!
- إنتِ أكثر... فينك؟
- إنتِ اللي فينك يا ست (أسماء)؟؟
- أنا كويسة جداً الحمد لله، الواد (محمد) ده طلع حكاية... كل ما أقول هنزهق من بعض تلاقينا هايصين أكثر!
- ربنا يسعدكم كمان وكمان.
- استني هنا إنتِ واسمه إيه يا ربي! آه .... إنتِ (حسام) عاملين إيه؟
- ابتسمت (أمل) ثم ردت عليها باقتضاب:  
قصدك (بسام).
- إيه ده؟ إزاي؟؟ إنتِ قولتيلي (حسام)!
- يعني أنا مش هعرف اسم البني آدم اللي كنت متصلة عشان أحكيك إنه اتقدملي؟
- إنتِ بتكلمي بجد؟؟ ألف ألف مبروك!
- لسه متباركيش دلوقتي... (بابا) لسه معرفش!
- متقلقيش إن شاء الله خير.

قضت (أمل) أول أيام الأسبوع هي وبسام منغمسين في العمل، ولكنهما كانا يتقابلان كلما سنح لهما الوقت وينتظران بعضهما البعض ليتناولوا العشاء معاً ويعرفا المزيد بعضهما عن البعض، في إحدى المرات قالت (أمل) :

- عارف ليه كثير من الناس مبتفهمنيش يا (بسام)؟
- عشان مبيفهموش؟
- لأ بتكلم بجد؟
- ليه؟

- عشان بحكم شغلي عارفة إن الموت عايش وسطينا وإحنا اللي مختارين منشفهوش، وبرضه بحكم شغلي عارفة إن الموت مش دائماً حاجة وحشة... بس الوحش فعلاً إنك تضيع بإيديك لحظات قصيرة أوي مع ناس بتحبهم، وساعتها الندم مبيبقاش له معنى. وعشان كده حتى (بابا) كنت بحاول أتصل بيه رغم إنه مبيردش عليا وكمان الأفندي (محمود) عشان بجد مش هارين عليا الوقت اللي مكناش بنفارق فيه بعض! ده وإحنا صغيرين كنا بنعيط عشان لما نكبر مينفعش نتجوز بعض ونجيب ولاد يلعبوا مع بعض ويحبوا بعض زينا؟ تخيل؟

- كنتِ عاوزه تتجوزي (محمود) وتسيبي (بسام)؟  
أهون عليك؟

- أنا مينفعش أكون غير ليك إنت وبس... إنت أجمل وأنقى راجل قابلته في حياتي، وبس بقى عشان ليا مزاج أقعد أعاكس فيك للصبح!

- وأنا جاهز يلا عاكسي فيا، بس بالراحة عليا عشان بتكسف.
- إنت ما بتصدق!
- خليك قَدْ كلامك بدل ما أقوم أفضحك وأعاكسك وسط الناس وإنتِ عرفاني مجنون!
- عاوزني أكون متحرشة آخر الزمن وأنا دكتورة محترمة قَدْ الدنيا؟
- آآه ومتحرشة برضه قَدْ الدنيا إيه المانع في كده؟ طب قوليلي بتحبي في شكلي إيه؟
- إحم... بصراحة إنت عامل كده زي الحاجة المسكرة بزيادة لدرجة مستفزة وريحة برفانك بتعجبني جداً ودقنك بحبها أوي ومحبهاش غير فيك إنت وبس.
- وشايلة كل ده في قلبك؟ ده إنتِ مسبتيش فيا حاجة يا متحرشة!
- تصدق إني غلطانة إني اتكلمت!
- هو أنا قولتلك إنك جميلة قبل كده؟
- إنتِ هتقلب متحرش زيي؟
- ده رداً على سؤالك... إنتِ جميلة بجد وعشان كده مبتتفهميش لأن محدش بيفكر زيك.

عندما وصلت (أمل) إلى منزلها في تلك الليلة من منتصف الأسبوع، نادتها (والدتها) بحزمٍ شديدٍ:

- (أمل)! تعالي هنا!

ذهبت إليها (أمل) مسرعة وهي فزعة:

- في إيه يا (ماما)؟ (محمود) كويس وإنتِ كويسة؟

- متقلقيش إحنا كويسين... النهارده اتكلمت مع أبوك وقولتله لازم نقعد كلنا مع بعض عشان نشوف موضوعك إنتِ و(بسام)، بس عاوزه أنبهك إن أبوك مش متقبل الفكرة وحيعاندا فخلي بالك.

- أنا مبقتش صغيرة وهعرف أتصرف معاه، كان نفسي ميحصلش أي مشاكل... بس أنا بقولك من دلوقتي، لو موافقش مش مشكلة، أنا يهمني موافقتك ورضاكِ وساعتها هخلي الموضوع رسمي فوراً.

- ربنا يسهل.

دخلت (أمل) الغرفة لتغير ملابسها وكانت على وشك النوم حينما رن هاتفها المحمول، فظنت أنها حالة ولادة أو (بسام) ولكن الحقيقة كانت غير ذلك!

- (أسماء)؟!

- أيوه (أسماء) مالك؟ هو كل مرة لازم إنتِ اللي تتصلي؟

- لأ مش قصدي بس مش عوايدك تتصلي وبالليل كده كمان فقلقت!

- (أمل) إنتِ ليه متغيرة من ناحيتي؟ كل ده عشان اللي اسمه (بسام) ده ظهر في حياتك؟

- كنت لسه هجاوب على سؤالك الأولاني بس سؤالك الثاني جاوبلي على سؤالِي.

- اللي هو إيه إن شاء الله؟

- إنتِ حقيقي متعرفنيش!

- (أمل) أنا...أنا... مقصدتش اللي في بالك!

- ولا تقصدي ... هو في رأيك إن المسألة مين اتغير  
على مين ولا مين بس فتح عنيه؟
- إيه الكلام ده؟
- (أسماء) إنتِ فين في حياتي؟ إنتِ عارفة إنك أقرب  
واحدة ليا وإني محتجالك أوي وقولتلك كده أكثر  
من مرة. إنتِ بقي كنتِ فين؟ والأهم ليه؟
- هو إنتِ بتكلميني كده ليه؟ مش كفاية إنك مش  
مقدرة ظروفني!
- ده أنا! طيب إحكي لي عن ظروفك!
- ما إنتِ عارفة ظروف الشغل والبنك والبيت  
وكنت بنام كتير صدقيني الفترة اللي فاتت.
- طب صحي النوم وأكملك أنا ... و(مجد) وصحابك  
التانيين اللي ما شاء الله عليكم اللهم لا حسد  
مبتفارقوش بعض ثانية، وموبايلك اللي في إيدك  
24 ساعة، وكنت طالبة منك بس رسالة تظمني  
عليك فيها واستخسرتها فيا!
- يااااه ده إنتِ معبية أوي. وبعدين أنا أفهم اللي  
مضايق من حد يقوله - ده لو كان أصلاً عزيز  
عليه وباقى عليه - ومش هتذليني يعني إنك  
بتكلميني أكثر وبتقلقي عليا... وبعدين المفروض  
أعملك إيه يعني؟ أجي مثلاً أبات عندكم في البيت  
بدل أخوك (محمود) اللي مش بتشوفيه؟
- كتر ألف خيرك وحسي الله ونعم الوكيل فيا ...  
حقك هيجيلك مني أهو.

- أنهت (أمل) المكالمة على الفور وتعجبت من قوتها وثباتها  
أثناء المكالمة، ولكنها لم تستطيع أن تمنع نفسها من البكاء:
- معقول ممكن كلامها ليا يكون صح؟
  - لو عاوزه تصدقي إن كلامها صح وتشكي في نفسك  
يبقى حسبي والله ونعم الوكيل فيك فعلاً.

"صباح الخير أول ما تصحى كلمني"  
استيقظ (بسام) على هذه الرسالة من (أمل) في السابعة  
صباحاً يوم الأربعاء فاتصل بها:

- صباح النور يا حبيبي عاملة إيه؟
- الحمد لله إنت عامل إيه؟ صوتك لسه نايم،  
صحصح كده طيب وكلمني.
- إنت كويسة؟؟
- أنا كويسة بس ممكن أطلب منك طلب؟
- أنا قولتلك مليون مرة قبل كده تطلبي أي حاجة  
على طول من غير استئذان.
- ممكن تبجي توصلني معاك المستشفى عشان مش  
قادرة أسوق؟ أنا يا دوب بحاول أشرب في قهوة  
واسبرسو عشان أفوق للمرضى.
- ما أنا عارف إنك مش كويسة... أنا هاخذ دش  
وألبس ومسافة السكة.
- أوكي لما تديني رنة هَنزل، بس بالراحة وإنت سايق.
- وصل (بسام) وكان في غاية القلق على (أمل) ولكنه حاول  
إخفاء ذلك بمحاولات إضحاكها ومداعبتها:
- مَلَقْتش في الوقت ده بتاع ورد فاتح، وأنا عارف  
إنك بتحيي شوكلاتة (رافايلو) فجبتها لك بسرعة.
- الله!!! أنا فعلاً بحبها أوي هو إنت لسه فاكر إني  
قولتلك إني بحبها؟

- أنا فاكر أنك قولتيلي إنك بتحبييني.
- وأنا فاكرة إني قولتلك إني بموووت فيك.
- وأنا بعشق اليوم اللي قابلتك فيه.
- (بسام)!
- قلب (بسام)؟
- شايف الواد الحليوة الأسمراني اللي جاي علينا ده؟
- نعم؟! واد حليوة؟ وقدامي؟
- مش أحسن ما أقول كده من وراك!
- لأ عندك حق وماله يا حبيبتى! طب شايفة البنت اللي...
- حيلك حيلك إنت ما صدقت! ده أنا آكلك وآكلها!
- طب ما تقولي لنفسك!
- على العموم الواد الحليوة اللي بقولك عليه اللي جاي ناحيتنا ده يبقى (محمود)!
- ده مش شبهك خالص!
- استنى عليا..
- فتحت (أمل) زجاج السيارة وأخرجت رأسها ونادت (محمود):
- أموت أنا في الشباب والرياضة!
- تسمر (محمود) في مكانه لأنه يعرف هذا الصوت جيداً والتفت وراءه:
- (أمل)!!
- حد يرجع بيته وقت ما الناس بتنزل من بيوتها؟

- أنا المرة دي محترم ومستأذن (ماما)، وبعدين أنا إمبارح كان عندي ماتش كورة مهم، إيش فهمك إنت!
- نسيت أعرفك يا (محمود)... مهو لو حضرتك بترد عليا ولا بتخليني أشوفك كنت عرفت مين ده لوحذك.
- (دكتور بسام الجوهري)؟
- إيه ده عرفت إزاي؟
- مهو (ماما) بتحكيلي أخبارك وهي بتأظم فيا. على فكرة أنا مش وحش أوي كده، أنا بسأل عليك من وراك... إزيك يا (بسام).
- أهلاً بيك يا (محمود) .... (أمل) بتحكيلي عنك كتير، ده أنا يا راجل مصدقت أتعرف عليك.
- ده شرف لينا يا باشا...
- بقولك يا (حودة)... أنا نفسي أَلعب كورة بقالي فترة وصحابي مطنشي، تاخديني معاك مرة؟
- شايقة الناس اللي بتفهم يا (أمولة)؟
- ده إنت تؤولر... هات موبايك أرني من عندك ونظبطها مع بعض.
- يا سلام يا سلام كملت!
- خلاص يا (بيبو) هنزبط مع بعض، وأنا أخ *open minded* ومش هوصيك على أختي.
- عيب يا (حودة) دي عيوني.
- بس سيبك إنت يا (بسام) ... إيه رأيك في سمانة (محمود)؟ هتاكل منه حتة!



- إنتِ بتهرجي يا (أمل)... إنتِ شاكة إن كلامها صح؟؟
- بصراحة شكيت.
- أساساً لولا إنك بتحببها وهي صاحبتك أنا كنت قولت عليها كلام مش هيعجبك، بس كل اللي هقولها هوك هي متصلة تجر شَكلك وحاسة إنك بعدتِ عنها ومش عاوزة تطلع نفسها غلطانة، وعندها القدر الكافي من البجاجة إنها تقلب عليك الطرايزة وتقنّعك إنها أحسن منك.
- هو أنا صغيرة أوي كده في نظر الناس؟
- المهم إنتِ بتشوفي نفسك إزاي.
- أنا بحاول أضحك وأهزر وأعمل إن مش هاممني حاجة، بس أنا تعبانة أوي يا (بسام).
- امشي ورا قلبك لو حسيتِ في لحظة إن اللي قدامك ميستهلش مشاعرك، اسمعي صوت قلبك، مهو له صوتين وإحنا دايماً بنسمع الصوت اللي بنحبه واللي بنحتاجه وبننسى الصوت اللي حاسس بالحقيقة.
- أنا خايفة إنك تكون حلم... حلم معرفش أحققه أو حلم مش بتاعي أساساً... إنتِ أكيد مش حلم أو وهم، صح يا (بسام)؟!
- مش هجاوب على سؤالك، بس كل اللي هقولها هوك لو سمحتِ للخوف يسيطر عليكِ عمرك ما هتعملي أي حاجة في حياتك.

قررت (أمل) أن تتحدى مخاوفها وتستوعب واقعها مهما كانت صعوبته. وأصر (بسام) على توصيلها في نهاية اليوم حتى المصعد ليطمئن عليها، وظل واقفاً بجانبها منتظراً هبوط المصعد:

- (بسام) تعبتك معايا أوي النهارده، رَوِّح دلوقتي وطمني عليك لما توصل.
- نفسي ما أروحش ولا أمشي أبداً وأفضل جنبك على طول... واعتبريني بقي أناي بس أنا عايزك تفضلي معايا دايماً وليا لوحدي أنا وبس.
- مش هتكون أناي أكثر مني.
- تقارب الاثنان لاشعورياً بشدة وكانا على وشك أن يتبادلا أول قبلة لهما ولكن قاطعهما صوت هبوط المصعد في تلك اللحظة، فسقطت حقيبة (أمل) على قدم (بسام) فالتقطتها مسرعةً:

- أنا ... أنا ... لازم أنزل دلوقتي.
- وأنا كمان لازم.... إيه ده هتنزلي فين؟
- أنزل؟ قصدي أطلع!!
- أوصلك لحد فوق؟
- إنت بالذات تبعد عني في اللحظة دي.
- ههههههه... باي باي.

على الرغم من إحساس (أمل) بشعور غريب لم تألفه من قبل يجمع بين حرية الأسياد وضعف العبيد، فقد شعرت أيضاً برياح الوداع بعدما ابتعد عنها (بسام) وهو يغلق باب المصعد.

دخلت (أمل) المنزل معتقدة أن الجميع بانتظارها ولكنها لم تجد سوى (والدتها) و(محمود):

- إزيكم؟ (بابا) لسه مجاش؟ إيه ده (محمود) شخصياً وصل!
- صحيح أنا أخ واطي، بس مش لدرجة مكنش موجود في موضوع زي ده وأسندك لو بابا قل أصله كالعادة.
- إنت يا (ولد) يا قليل الأدب! إيه الألفاظ اللي بتقولها دي!!
- كملي الأسطوانة المشروخة بتاعتك يا (ماما) ... "مهو ده من كتر قعدة الشوارع وصحابك الصيع المقاطيع بتوع القهاوي والله أعلم إيه كمان!"
- كانت (أمل) تراقب حديث (والدتها) و(محمود) وهي تضحك بشدة:
- خلاص يا (ماما) هدي نفسك، وإنت يا سي (محمود) تعال هات حضن عشان واحشني من كتر ما بشوفك كل يوم وبتستناني.
- حبيبي يا (أموولة)... هو لازم يعني تلقيح الكلام ده. وبعد عدة ثوانٍ، صمت الجميع عندما سمعوا صوت مفتاح (الأب) أثناء فتحه باب الشقة:
- استلّقي وعديك يا (أمل)... هادم اللذات بنفسه جالك أهو!

- هههههههه مش كنت عاملي فيها حامي حمى الديار.

دخل رجل أصلع في منتصف الستينيات المنزل مُرتدياً بارمودا من الجينز، وبولو شيرت أصفر، وسلسلة فضية طويلة، وحذاء رياضياً. اندهشت (أمل) و(والدتها) لما شاهداه ولكن كان لا بد أن يعلق (محمود):

- إيه يا (بابا) الروشنة دي؟ ولا نقول يا (بوب)! ده

إنت أصغر مني يا راجل!

فردت الأم قائلة:

- بس يا (ولد) ائلم... كلم (أبوك) بطريقة أحسن من كده.

- غيرانة طبعاً من كلامه؟ (الواد) بي فهم وشايف (أبوهم) لسه شباب وبصحته.

- طيب ربنا يديك الصحة يا خويا.

- إزيك يا (بابا) ... تعال اتفضل أقعد متفضلش واقف.

وبعدين مش هتديني بوسة؟!

- ما إنت زي (أمك) يا ست (أمل) فاكرة إنك هتاكليني

بالحبتين دول؟ مش كفاية جايبني على ملا وشي

عشان خاطر حضرتك؟

- خلاص شكراً لحضرتك يا (بابا)، بس إنت فعلاً كنت

واحشني.

- السّهوكة دي تعمليها على حبيب القلب اللي أمه

داعية عليه إنما أنا عاجنك وخابزك، كفاية إنك خلفه

(أمك) خليها تنفعل ياختي يمكن تدخل بيها الجنة

ولا حاجة ههههههه ....

- (ماما) أنا داخلة أغير هدومي وجاية، وإنْت يا (محمود) شوف (بابا) يحب يشرب إيه ولو حابب يشرب قهوة استناني لحد ما أجي أنا أعملها له.
- حمار أنا قاعد بيتكلم وحضرتك يا دكتورة يا محترمة ماشية وسيباني! فاكرة إنك هتسكتيني بقهوتك المرة اللي مررتي عيشتي بيها؟
- (بابا) متكلمش (أمل) كده هي عملتك إيه لده كله... بالراحة عليها شوية!
- اخرس إنْت يا (محمود).
- بلاش ندخل الولاد في مشاكلنا يا (حسين)... إنْت عارف إن (أمل) جالها عريس وعاوز يقابلك... هو دكتور تخدير معاها في المستشفى والولد محترم جداً وجاهز وعنده شقة كمان، وأنا مَوْقَّعة الموضوع وقلت لازم ناخذ موافقتك قبل أي حاجة، إنْت أبوها ولسه عايش!
- مش موافق.
- طب اتفاهم مع (أمل) بس يا (بابا)... حتى قولها مش موافق ليه يمكن إنْت شايف حاجة مثلاً هي مش شايفها. وأنا شففته بصراحة الولد محترم جداً وشكله بيخاف أوي على (أمل)...
- قولتلك اخرس يا (محمود)! وبعدين لازم يبقى دكتور تخدير ومتخدر عشان يدبس التدبيسة السوداء دي ههههههه....
- (بابا) بعد إذنك يمكن (ماما) ساكتة عشان خاطر (أمل) بس أنا مش قادر أشوفك بتكلم (أمل) كده.

- هتعملي إيه بقى إن شاء الله؟ هتربيني من أول  
وجديد؟ شايفني ناقص رباية؟ مش ناقص غير واحد  
مُهزاً وفاشل زيك تربية أمه يقف ويقول الكلمتين  
دول ويفتكركلي نفسه خلاص بقى راجل.
- (محمود)! انزل من فضلك وأنا هخلص الموضوع مع  
(بابا).
- لأ مش هسيبك يا (أمل).
- يا خراي على الحب والأخوة أنا قلبي بيرفرف وعنيا  
هتدمع... مناديل من فضلكم؟

- نزل (محمود) بالفعل ونهض (الأب) غاضباً متجهاً نحو  
(أمل)، ووقفت (الأم) أيضاً استعداداً لما توقعته حدوثه:
- إنتِ بتتحديني؟ ما إنتِ سمعتِ إنك هتتجوزي  
(صالح) ولا أنا كلامي مبيتسمعش؟
  - أنا عمري ما قصدت أتحداك، وكثير حاولت أوصلك  
ده بس إنتِ اللي بتستقوى علينا وعلى (ماما) زي ما  
إنتِ عايز دلوقتي تستقوى عليا عشان عارف إنك  
أبويا ومش هعرف أعملك حاجة.
  - صُدم (الأب) من كلمات (أمل) القوية التي قالتها وهي تنظر  
في عينيه بمنتهى الشراسة:
  - بس أنا كبرت ومش معنى إني مش هعرف أعملك  
حاجة إني مش هعرف أعمل أي حاجة.
  - مش بقولك أمه داعية عليه، ما إنتِ بنت أمك.
  - آه بنت أُمي.
  - إنتِ فاكرة إنك هتخطيني قدام الأمر الواقع وهتخليني  
أوافق؟ طب برضه مش موافق وريني هتعملي إيه!

- عادي مش هأعمل حاجة.
- قصدك إيه؟
- قصدي هتجوزه، وعشان أنا بنت أعي للأسف  
هأضطر أعزمك على الفرحة... تخيل؟!
- ده على جثتي يا (أمل)!
- ماشي يا (بابا) يبقى الله يرحمك!!!
- استشاط (الأب) غضباً وصفح (أمل) عدة صفحات متتالية  
على وجهها دون توقف بسبب عدم ظهور أي علامة من  
علامات الوجود عليها مما زاد من استفزازه وغضبه:
- خلصت؟ شكلك إنت اللي إيدك وجعتك رغم إني  
لسه ما أتوجعتش!
- انسحب (الأب) واجماً حينما وجد نفسه أمام وحش لا يُقهر  
وانصرف من المنزل على الفور.
- (ماما)... شفتِ إزاي لما حسسته إنه مش أقوي مني  
مقدرش يعمل حاجة في الآخر! على العموم إنت حرة  
في نفسك بس بجد زعلانة منك فوق الوصف أنك  
مدافعتيش عني ولا عن علاقتي (ببسام) زي ما  
وعدتيني ولا حتى عن (محمود)!!! وكمان شيفاني  
بأنضرب وواقفة ساكتة!!
- كنتِ عاوزاني أعمل إيه؟ وموضوع (بسام) ده هيقف  
لحد ما (أبوك) يوافق... و(محمود) عادي يعني فين  
المشكلة، مهو واخذ على كده؟
- هو مين (بابا) ده اللي إنت محسساني إنه مشاركننا في  
حياتنا وهو أصلاً مجرد اسم اتحط على حظنا الأسود  
بالغلط في البطاقة؟

- عجبك مش عجبك برضه هيفضل (أبوك) وكلمته
- ماشية عليكِ حتى ولو غصباً عنك... وبعدين إنتِ
- عاوزه الناس يقولوا علينا إيه؟
- يعني أنني موضوع (بسام) صح؟
- صح.
- قوليلي إنك بتهزري!
- لأ!
- أوكي!
- تركت (أمل) (والدتها) وهي في شدة الغيظ والغضب والشَّرر
- يتطاير من كدمات وجهها:
- (أمل) تعالي هنا رايحة فين؟
- (ماما) أنا بجد أعصابي تعبانة... أنا بحضر حاجتي
- عشان مسافرة الشاليه بتاعنا في (إسكندرية) كام يوم،
- وهكلم المساعدة بتاعتي تاخد مكاني. ولو (بسام) جه
- هنا مش عاوازه يعرف حاجة غير مني وده آخر
- طلب هأطلبه منك.
- إنتِ إزاي هتسافري بالليل كده وإنِ لوحيدك
- وبالمنظر ده؟؟ طب سافري الصبح على الأقل!
- معلش يا (ماما) مش قادرة، وياريت (محمود)
- ميعرفش بكل اللي حصل ده وميجيش عندي
- الشاليه أو مش هتعرفولي طريق تاني!
- طب يا (بنتي) اسمعيني أنا فعلاً مكنتش...
- مع السلامة يا (ماما).

ركبت (أمل) سيارتها ولم تكن تدري كيف ستقطع كل تلك المسافة إلى (الإسكندرية)، ولكنها في تلك اللحظة لم تبالي بأي شيء ولم تفكر في أي شيء سوى (بسام). كانت (والدتها) تتصل بها بشكل متكرر منذ لحظة نزولها، فأغلقت هاتفها المحمول.

وفي تلك الأثناء، وصل (محمود) إلى المنزل ووجد (والدته) في حالة ذعر غير مسبوقة:

- فين (أمل)؟
- (أختك) سافرت.
- نعم؟ دلوقتي؟!!
- هي و(أبوك) شدوا جامد ومد إيده عليها...
- إيه؟؟؟ وحضرتك عادي؟؟
- خلاص يا (محمود) متعمليش مشاكل إنت كمان.
- أنا رايح أعرفه كويس يعني إيه يمد إيده على (أمل)!
- اتجه (محمود) صوب الباب غاضباً وركضت (الأم) خلفه حتى أمسكت بذراعه وهي تصرخ:
- ارحمووووني بقي حرااام عليكم متبقاش إنت و(أختك) عليا!
- (أمل) سافرت فين؟؟
- (أمل) رايحة (إسكندرية) وقالتي لو روحتها هتتعصب زيادة ومش هترجع أبداً... وبعدين أنا هعلق عليك ولا عليها! والله ما قادرة أستحمل!

- خلاص حاضر يلا نeced نتفرج عليها وهي بتضيع مننا... لو حصلها أي حاجة يا (ماما) افتكري كلامي كويس... أنا مش هسامحك ولا إنتِ ولا (بابا) أبداً!
- أنا عارفة الوحيد اللي هيقدر يتفاهم معاها وهي في الحالة دي... (بسام)!
- أقسم بالله عيلةً مجنونة!! دلوقتي (بسام) بقي حلوا!! ارتبكت (الأم) وحاولت أن تداري خجلها وشعورها بالذنب:
- متعرفش رقمه يا (محمود)?
- والله ولد محترم خسارة في العيلة العرة دي! أنا لو منه مَعْبْرُكوش!
- مش وقت قلة أدبك يا (محمود)! معاك رقمه؟
- هتصلك بيه بس إنتِ اللي هتكلميه... أقول للراجل أنا إيه بس!
- اتصل (محمود) (بسام). وعندما رأى (بسام) رقم (محمود) في وقت متأخر من الليل، بدأ يشعر بالقلق والانقباض:
- (محمود)?
- (بسام)? أنا والدة (أمل)!
- والدة (أمل)?
- (بسام) هاتلي (بنتي).
- يعني إيه مش فاهم؟ من فضلك فهميني يا (طنط)!!
- (أمل) نزلت من نص ساعة لوحدها سافرت (إسكندرية) وقفلت موبايلها وحالتها وحشة أوي...
- (طنط) إحنا في نص الليل؟ حضرتك عارفة يعني إيه؟ و(أمل) أصلاً متعرفش تسوق وهي في الحالة دي!
- حصل مشكلة كبيرة في البيت بينها وبين (أبوها) ومد إيدھ عليها!

- أنا هَلِّيس ونازل فوراً وهكلمك وأنا في العربية أعرف منك أَلأقيها فين هناك، والأهم عاوز أعرف منك كل حاجة حصلت بالتفصيل الممل.

وفي أقل من 5 دقائق، كان (بسام) في سيارته واتصل (بوالدتها) وأخذ منها عنوان الشاليه، وعرف مكانه لأنه اعتاد منذ صغره أن يسافر إلى (الإسكندرية). علم (بسام) بكل ما حدث في تلك الليلة المشئومة، وحاول جاهداً أن يكظم غيظه بعد كل ما سمعه من (والدتها) التي شعر بالغضب تجاهها:

- متقلقيش يا (طنط)، أوعدك (بنتك) هتكون بخير. بس بعد اللي سمعته منك اللي هأوعدك بيه كمان إنها هتكون (مراتي) على سنة الله ورسوله.

أنهى (بسام) المكالمة فوراً وحاول الاتصال (بأمل) ولكن هاتفها كان لا يزال مغلقاً. قاد (بسام) سيارته بسرعة جنونية وهو يحارب ظلام الطرق وأفكاره داعياً (الله) أن يصرف عن (أمل) كل سوء وأن يعينه على الوصول إليها في الوقت المناسب قبل أن يفقدها!

وصلت (أمل) بسلام ولكنها كانت في حالة يُرثى لها. كان الشاليه مطلقاً على البحر، المكان الذي تشعر فيه بالراحة منذ صغرها. ضحكت (أمل) بسخرية بعدما وجدت نفسها - رغم مرور عشرات السنين - ما زالت تقف وحيدة أمام البحر وهي تنظر إلى السماء وكأن شيئاً لم يتغير. كانت تقف بلا روح وهي تجهش بالبكاء بأعلى صوتها من كثرة الألم الذي مزقتها، كان الألم النفسي الصاعق أقوى آلاف المرات من كدمات جسدها التي لن تفارقها لبضعة أيام. وقبيل الفجر وصل (بسام) الشاليه وأصيب بالفرح عندما سمع أنين بكائها، فاتجه نحوها حتى إنها لم تشعر بوصوله وعانقها من الخلف وضمها من خصرها بشدة. لم تجزع (أمل)، بل أمالت رأسها إلى الخلف على عنقه وأغمضت عينيها:

- (بسام)....
- أهون عليك؟
- الدنيا كلها تهون عليّ إلا أنت.
- أنا حاسس إنك كنتِ مستنياني.
- محدش هيقطع المسافة دي كلها وفي الوقت ده
- عشاني غيرك، إنت متعرفش إني يتيمة... ولا أهل ولا صحاب... أنا...

كان (بسام) يشم رائحتها باشتياق ويحرك أصابع يديه بلهفة شديدة حول خصرها وهو يضمها حتى أصبحت غير قادرة

على النطق بشيء سوى اسمه وهي تلعب بأصابعها في خصل  
شعره الناعمة:

- (بسام).... حنيتك دبحاني!
- إنتِ اللي دابحة قلبي.
- أنا محتجالك أوي...
- أنا اللي محتجلك!
- إنتِ بجد ولا خيال؟
- أنا في العالم اللي إنتِ عايشة فيه.
- يبقى ميهمنيش إحنا فين...
- مش هتُبصلي برضه وهتفضلي تكلميني وإنتِ مدياني  
ظهرك؟

استدارت (أمل) ببطء إلى (بسام) وهي تنظر إلى أسفل حتى  
رفع رأسها إلى أعلى ليري وجهها، وكان خدها الأيمن بنفسجي  
اللون من شدة الصفعات. شعرت (أمل) بالخزي مما زاد حدة  
بكائها، فمسح دموعها وتَحسس موضع الكدمة في خدها  
الأيمن:

- معلش يا حبيبي لسه الوجة جامد؟
- آه شوية.
- قبّل (بسام) خدها بمنتهى الرقة ونظر إليها بابتسامة خفيفة:
- طب وكده لسه بيوجعك برضه؟
- ابتسمت (أمل) وهي تنظر إليه نظرة خجل مليئة بالامتنان:
- أنا حاسة إني سقانة أوي، الشال اللي لبساه مش  
عاملي حاجة!
- آآآآ بتقوليلي كده عشان أجبلك حاجة بقي من  
هدومي تلبسيها والحركات دي... ده بُعدك!

- هههههههه إنت الوحيد اللي بتعرف تضحكني...  
استناني هنا أنا هروح أجيب حاجة أثقل ألبسها من  
الشنطة.
- استني هنا.
- ظنت (أمل) أنه سيذهب إلى السيارة بدلاً منها بعدما أوقفها  
بصرامة، ولكنه أزال بدلاً من ذلك الشال عن كتفيها وعانقها  
عناقاً دافئاً:
- حد قالك قبل كده إنك دكتور تخدير شاطر أوي؟  
- آه ستات كتيبير قالولي قبل كده...  
- ستات؟!؟  
- طبعاً... إنت فكراني قليل!  
- طب وقالولك برضه إنهم بيعشقوك؟  
- لأ بصراحة مقالوليش!  
- طب أنا بأعشقتك...  
- بس أنا مش بأعشقتك...  
- ضربته (أمل) ضربة خفيفة على كتفه ثم ضمته بشدة:  
- بطل بقي.  
- طبعاً بأعشقتك... وبأعشقتك أوي كمان...  
- إنت تعبان أوي وصحيت في نص الليل بسببي!  
- إنت تعبانة أكثر مني... بصي أنا عارف إنك هتفضلي  
تعيطي ومش هتنامي فنعمل مع بعض اتفاق، ينفع؟  
- ينفع  
- نفضل قاعدين قدام البحر بدون كلام وإنت تميلي  
راسك على كتفي وتعيطي براحتك، وأنا هقعد جنبك  
بس وأمسح دموعك.

قارنت (أمل) بين حب (بسام) لها وقسوة (والدها) عليها وأطالت النظر في عيني (بسام) وقبّلته على خده قبل أن تجري مسرعةً وتجلس أمام البحر. لحق بها (بسام) حتى جلسا معاً ووضع رأسها على ركبته اليسرى وبدأ في تدليك شعرها برفق:

- لو عاوزه تعيطي عيطي، ولو عاوزه تنامي نامي.  
تذكرت (أمل) كل ما حدث بأدق التفاصيل وكأنه يتكرر للمرة الثانية أمامها وبدأت تنهار مرةً أخرى، فما كان من (بسام) إلا أن مسح دموعها وحبس دموعه.

- أنا مش عاوزه أرجع البيت ده تاني!  
- ومين قالك إنك هترجي؟  
- هنجوز علطول؟  
- أنا هتجوزك أول ما نرجع إن شاء الله غصباً عنك حتى لو إنيت مش عاوزه.  
- طب أنا غيرت رأيي ومش عاوزه!  
- بقى كده؟ جواب نهائي؟  
- هجاوبك الجواب النهائي بس غمض عنيك الأول وإتمنى أمنية.

- في رمش تحت عنيا ولا إيه؟  
- حاجة زي كده...

وبمجرد أن أغمض (بسام) عينيه، أمسكت (أمل) يد (بسام) ووضعتها على قلبها:

- جاوبتك؟  
- (أمل)....

- قلبي عايش بيك وليك وبيتحامي كل ليلة في حضنك... أنا بيك بختار الحياة... ومن لحظة ما حبيتك وأنا بعيش كل لحظة على أمل لقاك.
- مش إنتِ اللي اختارتيني ولا أنا اللي اخترتك... حينا قدر هيتعاش بإرادتنا أو غصب عنا... إحنا لبعض... أنا مش هسيبك أبداً.
- ابتسمت (أمل) ووضعت رأسها على كتف (بسام) وتشابكت أيديهما... ثم حملها فجأة واتجه إلى الشاليه:
- إنتِ بتعمل إيه يا مجنون؟
- بكره ورانا سفر لازم نجيب حاجتك من الشنطة وأدخلك الشاليه.
- طب وإنتِ؟
- هَنا في العربية.
- ابتسمت (أمل) لازيادة إعجابها (بسام) واحترامها له، فقد حمل حقيبتها وتأكد من سلامتها وأغلق باب الشاليه بنفسه. بعد صلاة الظهر، استيقظ (بسام) من نومه وذهب لإحضار بعض الطعام للإفطار ثم رجع إلى الشاليه وطرق الباب:
- صباح الخير... صحيت من بدري؟
- صحيت من ساعة كده وبصيت بره لقيتك نايم فمحببتش أصحيك.
- طب ممكن أدخل بس الحمام وبعدين نفطر بره؟
- آه طبعاً اتفضل يا (بسام)... وأنا مستنياك بره والمفاتيح أهي حَظها لك هنا.
- خرج (بسام) من الحمام وأخرج أغراض (أمل) وأغلق الشاليه:
- إنتِ مُتعبة في الأكل بقي ولازم نقعد نأكلك زي البيبي.

- إنتِ اللي هتاكل الأول يا (بسام) بص شكلك تعبان  
إزاي!  
- ملكيش دعوة بيا وأنا بأكلك هاكل معاكِ.  
- خلاص إنتِ هتأكلني وأنا هاأكلك!  
وبعد الإفطار، جلس الاثنان للراحة والتحدث قليلاً قبل  
السفر:

- إنتِ بجد أحسن؟  
- طول ما إنتِ جنبي أنا أحسن يا (بسام).  
- نمتِ كويس؟  
- نمتِ كويس جداً.  
- كنتِ بتفكري في اللي حصل هنا إمبارح يا (أمل)؟  
- إمبارح؟ ليه هو حصل حاجة؟  
- بدمتك محصلش أي حاجة هنا؟  
- خالص!!  
نهضتِ (أمل) ضاحكةً وهي تنظر إلى (بسام) وتركض بعيداً،  
فركض خلفها حتى أمسكها وعانقها:  
- لسه مصرّة على رأيك؟  
- خلاص يا (بسام) خلاص فعلاً حصل حاجة...  
حاولتِ (أمل) أن تهرب منه ثانيةً لتداعبه ولكنه تمكن من  
محاصرتها حتى لم تجد مجالاً للهروب وكانت أنفاسهم  
تتسارع:

- (بسام) إنتِ...  
- أنا إيه؟  
- إنتِ...  
- إيه؟  
- إحنا لازم نزل القاهرة بسرعة!

كان صوت الأجهزة مُقبضاً، وكان صوت الألم يتعالى بلغة  
يَصْغُب فهمها، وكان الهواء ثقيلًا للغاية، وكان بالكاد قادراً  
على التنفس:

- (أمل) فين؟؟ ردوا عليا!!
- إهدى يا (أستاذ)... الحمد لله كده إطمنا إنه مجرد  
ارتجاج خفيف والذاكرة بدأت ترجع.
- حد يرد عليا... (أمل) فين؟
- ممكن تهدي يا (أستاذ) وتحاول تفكر اللي حصل  
وتحكلنا؟
- بدأ (بسام) في الصراخ والبكاء والحراك بهيستيريا حتى حقنه  
الطبيب بمهدئ لكي يرتاح وينام بعد ذلك توجه الطبيب إلى  
رجل واقف بالغرفة قائلاً:
- لسه يا (سعادة الباشا) المريض في حالة متسمحش  
بالاستجواب.
- متوقع إمتي ممكن ناخذ إفادته يا (دكتور)؟
- ممكن بكرة إن شاء الله. هو مكنش فيه أي شهود  
تانيين غيره على الحادثة؟
- استجوبنا الأم والطفلين بس هو أهم شاهد بالنسبالنا.
- إن شاء الله بكرة يكون جاهز للاستجواب.

وفي الصباح الباكر، دخل الطبيب والممرضة لفحص (بسام)  
والأطمئنان عليه:

- الحمد لله يا (دكتور) النهارده أعصابك أحسن بكثير. وبعدين يرضيك نكتشف من البطاقة بالصدفة إنك زميل مهنة ومتقولناش؟
- (أمل) كمان كانت زميلة ... فين (أمل)؟
- لما يبجي (سعادة الباشا) بلغوه إن (دكتور بسام) بقى جاهز للاستجواب!

وبعد مرور عدة ساعات، دخل غرفة (بسام) رجل ضخمة البنية أصلع الشعر في أواخر الأربعينيات وهو لا يزال مرتدياً نظارته الشمسية السوداء، وأحضر كرسيّاً من كراسي الغرفة وجلس بجانب (بسام):

- معاك الرائد (ياسر راضي)...
- أرجوك يا (سيادة الرائد) قولي فين (أمل)؟
- مهو أنا جايلك مخصوص عشان خاطر مدام (أمل)، مش مدام (أمل حسين رشدي) برضه؟
- مضبوط... فين (أمل) بقى؟ أنا عاوز أشوفها!
- إهدى يا أستاذ (بسام) عشان منتعش بعض.
- مش فاهم!
- إنت فاهمني كويس... أنا مقدر الصدمة العصبية اللي إنت اتعرضتلها لو كنت مكانك يا راجل أنا مكنتش استحملت!

صمت (بسام) وكأنه يتذكر شيئاً ما ثم بدأ في البكاء وهو يردد:

- لأ... دا أكيد كابوس.
- مش كابوس يا (دكتور بسام).
- طب أنا ملحقتش أشوفها بالفستان الأبيض.

- وَّحَدَّ اللهُ يَا راجل مش كده.
- (أمل) ماتت... (أمل) ماتت بين إيديا في لحظة ومعرفتش أعملها حاجة. بس صدقني مش فاكر الباقي.
- تعالى نبدأ من الأول وأنا هقولك اللي إنت مش فاكره... احكي لي من أول ما وصلت (المنيل) إنت و(دكتورة أمل)؟
- كنا لسه كاتيين كتابنا مش فاكر ده كان إمبارح ولا أول إمبارح ولا إمتي!
- وبعدين؟
- احتفلنا احتفال بسيط أنا وهي وأخوها (محمود)، وقررنا نروح (المنيل) نتعشى وبعدين نشترى بدلة وفستان فرح ونحتفل لوحدنا آخر الليل. كان في ظروف عائلية حصلت عندها منعنا من إننا نحتفل ونعمل فرح كبير.
- كمّّل؟
- روحنا مطعم في (المنيل) كان أول مطعم اتعشنا فيه سوا وكله كان ماشي تمام...
- وإيه اللي حصل؟
- دفعْتُ الحساب ورحت أجيب العربية عشان كنت راكنا بعيد، بس هي قالتلي مش قادرة تيجي معايا هتستناني فُدام المطعم وبعدين حصل اللي حصل. وأرجوك مش قادر أكمل أعتقد الباقي حضرتك تعرفه أكثر مني!
- وبعدين كانت فيه أم على الرصيف المقابل (لدكتورة أمل) معاها توأم عمرهم ست سنين وطفل تاني عنده

سنتين، و(الأب) و(الأم) كانوا بيتخانقوا في الوقت ده فمخدوش بالهم إن ابنهم اللي عنده سنتين كان ماشي لوحده في الشارع وجات عربية ماشية بسرعة جداً وكانت هتخبط الولد. (دكتورة أمل) - الله يرحمها - خدت بالها وجريت بسرعة عشان تفادي الولد وخذت الخبطة بداله، والخبطة كانت مميتة فماتت في الحال. وساعتها إنت كنت وصلت وشفيت الحادثة، وجاتلك حالة هيسيرية خصوصاً لما حاولت تسعفها، وبحكم شغلك عرفت إنها خلاص اتوفت. وللأسف السواق المستهتر اللي عمل فيها كده هرب وسابها سايحة في دمها. وطبعاً ملقتش غير (أبو الولد) قدامك فقعدت تضرب فيه بعنف، فاضطر إنه يخبطك خبطة قوية في راسك دفاعاً عن نفسه والخبطة دي أفقدتك وعيك. إحنا هنعمل كل اللي نقدر عليه عشان نوصل للي عمل كده و(أهل الولد) مضايقين جداً ونفسهم يقابلوك ويحضروا عزا (دكتور أمل) الله يرحمها...

- اللي فاكرة إن الحيوان ده كان سايق عربية (هيونداي فيرنا موديل 2016 تقريباً) وكان لونها أحمر.
- إحنا خدنا أقوال (الأم) و(الأب)، وربنا بيحبك إن واحد منهم قدر يحفظ أرقام العربية وده هيساعدنا جداً.
- أرجوك أول ما توصلوا للكلب ده بلغوني!

انفصل (بسام) عن الواقع وبدأت عليه علامات التعاسة والغضب، بينما كانت والدة (أمل) في حالة من الوجوم ولم تكف عن ترديد "الله يرحمك يا بنتي... الله يرحمك يا حبيبتي... سامحيني رحمتي مني وإنّ زعلانة مني... أرجوك سامحيني أنا هفضل عايشة طول العمر بذنبك."

حاول (محمود) مواسة (والدته) وهو يبكي في أنين ودموعه الغزيرة تتحدث عما يدور بداخله من ألم وحزن دفينين وهو ينظر إلى (والده) شزراً بعدما أصيب بالشلل وأصبح لا يقوى على الحركة. وأصبحت نقود العالم أجمع غير قادرة على شفائه نتيجة صدمته العصبية. وبعدها رحل الجميع، جلس (بسام) بجانب قبر (أمل) ووضع عليه فستان زفافها الأبيض وبوكيه ورد وهو ينزف دمعاً:

- متزعلش يا حبيبتي أنا جبتلك فستان فرحك... ربنا كاتبنا نتجوز كده، أنا كمان لابس البدلة اللي اخترتها لي. أنا عارف إنك شايفاني وحاسة بقلبي اللي مات معاك وادفن معاك. هكذب عليك لو قلتك إني اتخيلت إني هحترف بفرحنا في جنازتك. أنا ملحقتش أتهدني بيك ولا لحقت أعوضك!! بس إنت هتفضل عايشة معايا... عارفة؟ أنا خليت (محمود) يجبلي حاجتك كلها عشان تبقى عندي في البيت وإديته عربيتي وخذت عربيتك عشان تبقى من ريحتك، بس سبت المستشفى عشان مش قادر أدخل

ومشوفكيش... آآآآآه يا (أمل) ملحقتش آخذك في  
 حضني طول الليل ونسي اللي فات. صدقيني أنا  
 هجبلك حقك من اللي عمل فيك كده، ويا رب  
 متكونيش اتألمت أكثر ما كنت مليانة وجع... بس أنا  
 واثق إن ربنا رحيم. وأوعدك إني كمان هخُذلك حقك  
 من كل اللي جرحك وخلي عيونك اللي بعشقها  
 تدمع... وحشتني أوي لهفة عيونك لما تشوفيني، بس  
 والله يا حبيبتني مش هسيبك... إحنا الاتنين خلاص  
 بقينا في الضلمة سوا.

كان (بسام) منحنيًا على القبر وهو يبكي بشدة، وكان  
 أصدقاؤه يراقبونه في صمت ولكنهم شعروا أن عليهم  
 إخراجه من المقابر. لم يقوَ (بسام) على الحركة، فساعده  
 على النهوض وأوصلوه إلى المنزل وظل صديقه (خالد) معه  
 حتى تأكد من نومه.

لم تمر عدة دقائق حتى سمع (خالد) صراخ (بسام) "لأ لأ  
 لأ... اطلبوا الإسعاف بسرعة... بقولكم بسرعة إنتو بتتفرجوا  
 على إيه!!"

دخل (خالد) مسرعاً إلى غرفة (بسام) ووجده يلهث وأنفاسه  
 تتسارع وهو يحمل شال (أمل) بين يديه:

- مالك يا (بسام)؟ خضتني!
- مش بشوف غير الحادثة ووشها وهو غرقان دم.
- شد حيلك...
- مش ملاحظ إن كل اللي بحبهم وكل أهلي عمرهم  
 قصير؟
- (بسام) استغفر ربنا متقلش كده.

وفي تلك الأثناء، رن محمول (بسام) وكان رقماً خاصاً:

- ألو!
- أستاذ (بسام)؟
- أيوه
- معاك الرائد (ياسر راضي). حبيت أطمئنك إنا قبضنا على اللي اتسبب في حادثة (مراتك)...
- أنا جاي فوراً.

ارتدى (بسام) ملابسه مسرعاً، ورفض أن يرافقه (خالد) أو يقود السيارة بدلا منه وانطلق إلى (قسم شرطة المنيل):

- بعد إذنك فين مكتب الرائد (ياسر راضي)؟
- آخر الممر على الشمال.
- شكراً.

وصل (بسام) إلى المكتب وانتظر حتى أُذن له بالدخول. رحب الرائد (ياسر) (بسام) وأمر باستدعاء المتهم على الفور!

- على فكرة الشهود التانيين اتعرفوا عليه!

وفي تلك الأثناء دخل شاب مكبل اليدين. وفجأة ركض (بسام) نحو الشاب وهو يستشيط غضباً وأمسك به بعنف حتى كادت ملابسه أن تتمزق:

- آآآآه يا ابن الكلب يا واطي...  
حاول أحد العساكر إبعاد (بسام) عن المتهم، فأمره الرائد (ياسر) أن يصطحب المتهم إلى زنزانة الحجز الاحتياطي، ووجه كلامه إلى (بسام):

- بكره إن شاء الله حنحوه للنيابة.

ارتاح (بسام) بعض الشيء بعدما عرف أن دم (أمل) لن يضيع هدرًا. ذهب بعدها إلى المقابر مرة أخرى وجلس بجانب قبرها:

- حبيبتى قبضوا خلاص على اللي كان سبب في فراقنا.  
مش قولتك حقك هيجيلك؟ بس حقك الحقيقي  
لسه مجاش وهتشوفي أنا لسه هعمل إيه!

ذهب (بسام) إلى منزل (أمل) لإخبار أهلها بنبأ القبض على الشاب الذي تسبب في مقتلها، وقرر أن يخبرهم أنه أعلن للجميع أن عزاء (أمل) سيكون في منزله. وصل (بسام) إلى الشقة ودق الباب فسمع أصوات سباب وصراخ وعراك حتى فتح له (محمود):

- فيه إيه يا (محمود)؟ صوتكم واصل لبره!  
- لا أبدأ أصل خلاص الكل بيعتبنى فاشل وهما أصلاً  
سبب فشلي، وتخيل يا دوب (ماما) افتكرت إنها  
تطلب الطلاق دلوقتي... لأ وكمان تصر عليه!  
- اخرس يا (محمود) يا قليل الأدب ومتدخلش في اللي  
ملكش فيه، مش كفاية شايف حالة (أبوك) عاملة  
إزاي من بعد خبر وفاة (أختك)؟  
- أنا مش فاشل يا (ماما)... أنا مش فاشل يا (بسام).. أنا  
مخنوق وأي كلمة أقولها بيتقالي اخرس زي ما إنت  
شايف.

فجأة أخذ (بسام) يصفق للحاضرين قائلاً:  
- برافو برافو برافو! أنا مستمتع جداً بالأداء الرائع بتاع  
كل واحد فيكم! على العموم أنا كنت جاي أبلغكم  
بمعاد عزا (أمل)، بكرة إن شاء الله في بيتها، والحمد

لله اتقبض على الحيوان الي عمل فيها كده... بس  
بأمانة كده أنا لسه برضه مخدتش حقها.  
فسأله (محمود):

- قصدك إيه يا (بسام)؟  
اتجه نحو (الأم) ونظر إليها بجفاء:  
- أفكرك إنك كنتِ شيفاها بتتهان وبتضرب وما  
قولتلهاش حتى كلمة تطيب خاطرها، ولا حاربتِ  
عشان سعادتها، واضايقتِ أوي لأنها في الآخر هربت  
لحضني بعد ما إنتِ بنفسك استنجدتِ بيا؟ لا تكوني  
فاكرة إنك كده بتكفري عن سيئاتك لما طلبت أخيراً  
الطلاق؟ أحب أقول لحضرتك إنك طلقتِ (بنتك)  
من زمان! سلبيتك وصلتنا لهننا يا (مدام).

وأخيراً اتجه (بسام) نحو (الأب) وانحنى نحوه:  
- كلكم كنتم محسسنها إنها هوا عايش وسطيكم، كأنها  
ملهاش وجود، وإنتِ بالذات ملكش عندي غير  
جملتين اتنين... إنتِ مش هتدخل بيتي أنا و(أمل)،  
ولا هتاخذ عزاها.

صمت الجميع أمام كلمات (بسام) القاتلة، ولم يستطع أحد  
منهم أن يرد عليه. نظر إليهم (بسام) نظرة احتقار، ثم أغلق  
الباب خلفه بقوة ورحل. وقبل أن يصل سيارته، سمع (بسام)  
صوت (محمود):

- (بسام)! من فضلك استنى!  
تعجب (بسام) من قدوم (محمود) خلفه، وسأله:  
- خير يا (محمود)؟  
- أنا مش عاوز أرجع البيت ده تاني.

ابتسم (بسام) لأنه تذكر أن (أمل) قالت له الجملة نفسها من قبل وهما على شاطئ (الإسكندرية)، مما جعله يشعر بالمسئولية ذاتها تجاه (محمود) لأنه يعلم تماماً مدى حب (أمل) لأخيها (محمود).

- طيب إهدى يا (محمود) وفهمني!
- (بسام) أنا مش قادر أطلع البيت من غير (أمل)، وكل ما أطلع بفتكر الليلة السوداء اللي هدمت حياتنا، ولا قادر أتعامل مع (بابا) ولا حتى (ماما)... ممكن تاخذني معاك؟
- (محمود) إنت أخويا... أنا معنديش مشاكل بس هما عارفين فوق؟
- أنا قولتلهم إني مش راجع غير لما حياتنا تبقى حياة بجد وتتضببط وميبقاش فيها سلبية ولا قسوة. وأنا كمان قولتلهم إني مش فاشل وهنجح في حياتي مش علشان أثبت نفسي ليهم.. لأ أنا عاوز أثبت نفسي لنفسي وأهدي نجاحي (لأمل). أنا عارف إني زعلتها كثير وخذلتها، عشان كده عاوز أعوض اللي فاتني. هتساعدني يا (بسام)؟
- إنت بتسأل يا (محمود)؟ طبعاً هكون جنبك، وإنت أصلاً مش فاشل بس آن الآوان تفوق لنفسك وتديها حقها، وعلى العموم اركب ويلا بينا.

وفي صباح اليوم التالي، بدأ (بسام) في تجهيز نفسه وتنظيم المنزل استعداداً للعزاء، ووضع صورة كبيرة (لأمل) وسط الصالة وأخذ ينظر إليها في صمت وهو حزين، لا يشاركه

وجعه سوى وحدته. وفي تلك اللحظة، دق هاتف (بسام) المحمول:

- ألو! مين معايا؟!
- ألو! إنت (بسام)؟
- أيوه! إنت مين؟؟
- أنا.... (أسماء)!
- (أسماء) مين؟!
- صاحبة (أمل) الله يرحمها! أنا لسه عارفة الخبر وقُلت لازم أكلمك وأعرف العنوان عشان أجي العزا وأكلم باقي صحابنا، أكيد لما يعرفوا هيجوا معايا.
- الله يرحمك!
- أفندم؟!
- مين دي اللي صاحبة (أمل)؟
- أنا!!
- حسب معلوماتي إن حضرتك اتخلت عنها وسببتها بقالك كام شهر، دلوقتي جاية تبكي عليها؟ يعني نقتل القتل ونمشي في جنازته؟
- لو سمحت مَسْمَحلكش!
- يا شيخة ولا تسمحي لي سببتها ليه وهي عايشة؟ بذمتك لقيت حد يحبك بجد قدها؟ لو مش بتحبها سببها وخليك صريحة معاها أرحم من اللي عملته... إنت معملتش حساب إنك في لحظة ممكن تخسريها للأبد؟ لمعلوماتك بس... (أمل) كانت عايشة عندها أمل فيك وفي الكل لآخر لحظة من حياتها.
- كفاية يا (بسام) من فضلك!

- أستاذة (أسماء) ... (أمل) مكنش ليها صحاب وبلغي الرسالة للكل، وشكراً سعيكم مشكور.  
أنهى (بسام) المكالمة وهو يشعر أنه فعل ما لم تقدر (أمل) على فعله، وأنها من المؤكد الآن تشعر بالراحة بعد الحصول على حقها كاملاً.

شعرت (أسماء) بعد حديث (بسام) أنها جُردت من ملابسها أمام العلن، ولكنها لا تحب أن تواجه نفسها ولم تَعْتَد أن تعترف بخطئها أبداً:

- سامحيني يا (أمل) والله حبيتك من كل قلبي..  
وسامحيني إني مش قادرة حتى أبكي عليكِ دلوقتي لإني حسيت إني هبقى سخيصة أوي أوي لو بكيت على حد كان قدامي طول الوقت وأنا اللي سبته بإرادتي. ومن ساعة ما كلمت (بسام) وسؤال واحد بس بيتكرر على بالي ومش لاقِياله إجابة أو خايصة أوصل لإجابته...  
هو إحنا قدمنا للميت إيه وقت ما كان عايش وسطينا قبل ما نقعد ونبكي عليه؟ واضح إننا معيشين نفسنا في كدبة كبيرة عشان الحقيقة بتتوجع، وإحنا أضعف بكتييير من إننا نواجه نفسنا بيها.

رسالة ..

إلى كل إنسان على هذا الكوكب الافتراضى .. كن فى  
الحياة إنسان .. وصل رسالة طيبة للناس وانشر بينهما  
الخير والحب والسلام .. كن أنت فقط ولا تحاول أن  
تكون غيرك .. اصنع لنفسك عالم يليق بك .. إزرع  
داخلك الثقة والطموح والتفاؤل والرضا وحب الله  
والذات والوطن .

" الناشر "

للتواصل مع الدار :

[www.facebook.com/dar.cleopatra](http://www.facebook.com/dar.cleopatra)

Gmail : dar.cleopatra@gmail.com

: للاتصال

01019983371 / 01125574129 / 0225244534